

# पावलक लिखल छठो चिठी

(दङ्गौरा थारू)

२०७०

# Six Letters

# Written by Paul

Trial Edition  
2014  
(1000 Copies)

Illustration on cover by  
© David C. Cook Publishing Company, 1978  
Used with permission.

Illustrations on pages 5 and 8 by Horace Knowles, revised by Louise Bass  
© The British & Foreign Bible Society, 1994  
Used with permission.

Illustration on pages 9 by Graham Wade  
© United Bible Societies, 1989, Nairobi, Kenya  
Used with permission.

Dangaura Tharu Language and Literature Project  
and  
Dangaura Tharu Translation Committee

# थेसलोनिकीहुँकन

पावलक लिखल पैल्ह चिठी

## चिठीक परिचय

पावल खुशिक खबर प्रचार कर्ना क्रमम सिलास ओ तिमोथीकसँग माकेडोनिया क्षेत्रम पुगरलह (नक्शा हेरी)। हुँक माकेडोनियक फिलिप्पी शहरम खुशिक खबर प्रचार कर्ल। तबदोस पावल ओ सिलास माकेडोनियक राजधानी शहर थेसलोनिकाम गैल (प्रेरित १७:१)। हुँक उहाँ खुशिक खबर प्रचार कर्ल त धेर मनै विश्वास कर्ल (प्रेरित १७:४; १ थेसलोनिकी १:९)।

हुँक उहाँसे बेरिया शहरम गैल, ओ उ शहरम प्रचार कर्ल, उहाँ फे धेर मनै विश्वासी हुइल। तबदोस पावल एथेन्स शहरम गैल। उ एथेन्सम प्रचार कर्ल ओ कुछ समय पाछ सिलास ओ तिमोथी हुँकाहारठे अइल। पावल एथेन्सम रहलम थेसलोनिकीहुँक विश्वासम बलगर पलबाट कि नाहीं कैक बुझक लाग ओ हुँकन अर्तीउपदेश देहक लाग तिमोथीह थेसलोनिकाम पठैल (प्रेरित १७:१६; १ थेसलोनिकी ३:१-५)।

पावल एथेन्ससे बिदा होक कोरिन्थ शहरम गैल (प्रेरित १८:१)। पाछ सिलास ओ तिमोथी पावलकठे अइल (प्रेरित १८:५)। तिमोथी उत्साहजनक हालखबर लेक थेसलोनिकासे घुम्क अइल त, पावल थेसलोनिकीहुँकन पैल्ह चिठी लिखल (१ थेसलोनिकी ३:६)।

पावल खास कैक थेसलोनिकाम रहल विश्वासीन उत्साह देहक लाग यी चिठी लिखलह। पावल यी चिठी कैह्या लिखल कना बात बाइबल विद्वानहुँक स्पष्ट रूपले कह नैसेकट। प्रेरित १८:१२-१४ अनुसार, पावल कोरिन्थम रहल समयम गलियोन शासक रलह। याकर मतलब पावल यी चिठी सम्भवत: येशू जर्मलक ५० वर्ष पाछ लिखल।

## विषयसूचि

- पावल थेसलोनिका शहरम रहल मण्डलीह चिठी लिख्ठ (१:१)
- पावल थेसलोनिकीहुँक विश्वासी जीवन जीटीरलक कारण परमेश्वरह धन्यवाद  
चहैठ (१:२-१०)
- पावल थेसलोनिकीहुँकन खुशिक खबर प्रचार करबेरिक घटना सम्झैठ (२:१-१६)
- पावल थेसलोनिकीन्हकठे फेदोस्र जैना आपन इच्छा रहल बात बटोइठ  
(२:१७-२०)
- पावल तिमोथीह थेसलोनिकीन्हकठे पठैलक कारण देठ (३:१-५)
- तिमोथी थेसलोनिकीन्हकठेसे उत्साहजनक हालखबर लेक पावलकठे अइठ  
(३:६-१३)
- पावल असल ख्रीष्टीयन जीवन जीना बारेम व्यवहारिक सल्लाह देठ (४:१-१२)
- पावल येशू ख्रीष्ट जब फे आइसेकना हुइलकओसे थेसलोनिकीहुँक सचेत रहपर्ना  
बारेमा सिखैठ (४:१३-५:११)
- पावल ख्रीष्टीयन जीवन परमेश्वरह आदर देना हिसाबक हुइपर्ठा कैक सिखैठ  
(५:१२-२८)

## पावल थेसलोनिका शहरम रहल मण्डलीह चिठी लिख्ठ

१ परमेश्वर बाबा ओ प्रभु येशू ख्रीष्टक थेसलोनिकाम रहल मण्डलीह हम्र पावल,+ सिलास ओ तिमोथी यी चिठी लिखटी।<sup>†</sup> परमेश्वर दुहन अनुग्रह<sup>‡</sup> ओ शान्ति देहीं।

## पावल थेसलोनिकीहुँक विश्वासी जीवन जीटीरलक कारण परमेश्वरह धन्यवाद चहैठ

२ हम्र प्रार्थना करबेर सड्ड दुह सबजहन सम्झठी ओ परमेश्वरह धन्यवाद चहैठी।<sup>‡</sup> विश्वाससे करल दुन्हक काम, प्रेमसे करल दुन्हक परिश्रम, ओ प्रभु येशू ख्रीष्टकम रहल दुन्हक सहनशील आशा हमार परमेश्वर बाबक सामुन्ने हम्र सम्झटीरठी।

४ हेरो भैयौ, परमेश्वर जो दुहन प्रेम कैक रोज्लह कना बात हमन थाहाँ बा।<sup>†</sup> काकरकि दुहन प्रचार कैगिल् खुशिक खबर गफ केल नैरह, तर पवित्र आत्मक शक्तिले पक्का होक प्रचार कैगिल् सत्य वचन रह। ओ

दुन्हकसँग रहलम दुन्हकके हितक लाग हमार जीवन कसिन रह कना बात दुह अपन्हे जन्लबाटो।<sup>६</sup> हो, दुन्हकम आपत्विपत् परिआइल, तर फे दुह पवित्र आत्मक दिहल आनन्दम वचनह ग्रहण करलरलो। यी हिसाबले दुह हमार ओ प्रभुक देखासिकी कर्लो।<sup>७</sup> असिक दुह माकेडोनिया ओ अखैया क्षेत्रम रहल सब विश्वासीन्हक आघ एकठो नमुना बनरलो।

८ दुन्हक कारणले परमेश्वरक वचन माकेडोनिया ओ अखैयम केल नैफैलल्, तर परमेश्वरकम रहल दुन्हक विश्वासक बात सक्कुओर फैलल् बा। याकर बारेम हमार कहपर्ना बात कुछु नैहो।<sup>९</sup> हम्र दुन्हकठे अइली त, दुह हमन कसिन स्वागत कर्लो, ओ जीवित ओ सत्य परमेश्वरक सेवा करक लाग मूर्तिपूजमसे कसिक घुम्लो कना बात हुँक अपन्हे बटोइठ।<sup>१०</sup> दुह त परमेश्वरक छावा स्वर्गसे अउइया बाट कैक बट्या हेठो हुँ। उहाँ मुवलमसे फेदोस्र परमेश्वरक जीयाइल येशू हुइट। परमेश्वरसे अइना डरलग्टिक

† १.१ पावल खुशिक खबर प्रचार कर्ना कामम एक प्रभावशाली व्यक्ति रहल। थप जानकारीक लाग "पावल" शब्दक अर्थ हेरी।  
† १.१ हुइना त, पैल्ह वाक्य पहबेर यी चिठी तीन जन पावल, सिलास ओ तिमोथी मिल्ल संयुक्त रूपम लिख्ल जसिन देखपर्ठा, तर वास्तवम यी चिठी लिख्इया व्यक्ति पावल हुइट, ओ काज यिहाँ सिलास ओ तिमोथीक नाउँ फे उल्लेख हुइल बा कलसे, संभवतः पावल थेसलोनिकाम रहल समयम हुँक पावलकसँग रहल, ओ पावल यी चिठी लिखबेर फे हुँक पावलकसँग रहल।  
‡ १.१ अनुग्रहः बाइबलम अनुग्रह कलसे क्षमादान, मुक्तिदान, अचुक प्रेम, अपार कृपा आदि विषयह समेटठा। निगाहा, दया आदि शब्द फे अनुग्रहक अर्थ देठा। परमेश्वरक अनुग्रह कारणले हम्र मुक्ति पैठी (एफिसी २:८; तीतस २:११)। हम्र पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठल (रोमी ५:८)।

## थेसलोनिकीहुँकन २:१-१२

४

दण्डमसे हमन बँचुइया फे उहाँ जो हुइटा।

**पावल थेसलोनिकीहुँकन खुशिक  
खबर प्रचार करबेरिक घटना सम्झैठ**

२ हेरो भैयौ, टुन्हकठे हमार करल भेटघाट बिनकामक नैरह कैक त दुह अपन्हे जन्लबाटो। २ टुन्हकठे जैनासे आघ हम्र फिलिप्पी शहरम दुख पैलक ओ अपमानित हुइलक बात फे टुहन थाहाँ बा। तर धेर विरोध हुइटी-हुइटी फे हम्र टुहन खुशिक खबर प्रचार करक लाग परमेश्वरसे धेर साहस पैली।

३ काकरकि हमार दिहल अर्तीउपदेशम गल्ती बात, खराब विचार या कुछ छलकपट नैरह। ४ तर परमेश्वर हमन योग्य मान्क त खुशिक खबर प्रचार कर्ना जिम्मा देलह। उहओसेँ हम्र मनैन खुसी बनाइक लाग नाहीं तर हमार मनक जाँच करुइया परमेश्वरह खुसी बनाइक लाग बोली। ५ हम्र टुन्हकठे कुछ चापलुसी बात नैबटोइली कैक दुह जन्लबाटो। कुछ पैना ल्वाभले हम्र टुन्हक लगघक मनै हुइ नैखोज्ली कना बातक साक्षी त परमेश्वर पलबाटा। ६ हम्र मनैनसे आदर नैखोज्ली, ना त टुहनसे, ना और कौनोजहनसे।

७ हुइना त ख्रीष्टक प्रेरित हुइलकओसेँ हम्र टुन्हकम आपन अधिकार प्रयोग कर सेक्नेरलही, तर लर्कोच्या डाई आपन लर्कक् वास्ता करअस हम्र टुहनसे नम्र व्यवहार कर्ली। ८ हम्र टुहन धेर प्रेम कर्ली। उहओसेँ हम्र आनन्दित होक टुहन खुशिक खबर प्रचार केल नैकर्ली, तर टुन्हक वास्ता कैक हम्र आपन प्राणसमेत देहक लाग तयार रलही।

९ हेरो भैयौ, हम्र टुहन परमेश्वरक खुशिक खबर प्रचार करबेर किहुह फे भार नैपारी, तर आपन खर्च अपन्हे कमाइ कैक रातदिन खट्क काम कर्लक बात त दुह सम्झलबाटो।

१० टुह विश्वासीन्हकठे रहल समयम हमार व्यवहार स्वच्छ, ठीक, ओ निर्दोष रह। यी बातक साक्षी परमेश्वर ओ टुह अपन्हे बाटो। ११ ओ डाई-बाबा आपन छाइछावनसे करअस, हम्र टुह हरेकजहनसे व्यवहार कर्ली। यी बात टुहन थाहाँ बा। १२ टुन्हक चालचलन परमेश्वरक नजरम योग्य ह्वाए कना उद्देश्यले हम्र टुहन अर्तीउपदेश, उत्साह, ओ आदेश देटीरली। काकरकि परमेश्वर आपन राज्य ओ महानतम टुहन सहभागी हुइक लाग बलैठ।

१३ओ हम्न परमेश्वरह धन्यवाद चहैटीरठी, काकरकि हम्न दुहन परमेश्वरक वचन सुनैली त, दुह उ वचनह मनैन्हक वचनअस नाहीं, तर जाट्टीसे परमेश्वरक वचन मान्क स्वीकार कर्ली। हुइना फे उ परमेश्वरकऽ वचन हो, ओ उ वचन दुह विश्वास करुइयन्हक जीवनम काम कर्टीरठा।

१४यी बात हमन थाहाँ बा, हेरो भैयौ, काकरकि दुन्हकम जौन बात परिआइल उह बात यहूदीया क्षेत्रम रहल परमेश्वरक मण्डलीम अर्थात् ख्रीष्ट येशूकम विश्वास करल मनैन्हकम परिअइलन्। हुँक आप्पन जाति यहूदीनसे सँतावा पैलह, ओ ओसहँक, दुह फे आप्पन जातिक मनैनसे सँतावा पैलो। १५उह यहूदी जातिक मनै अगमवक्तन+ मुवैलह। प्रभु येशूह मुउइयन ओ हमन सँतुइयन फे हुँकहे हुइटा। हुँक परमेश्वरह मन नैपर्ना काम कर्ठ ओ सारा मनैन्हक विरोधीअस बाटा। १६अयहूदीहुँकन मुक्तिक सन्देश सुनैना हमार कामम हुँक बाधा पुगैल। असिक हुँक टिस्लाहार हुइट्सम आपन पापक

उप्पर पाप थप्टीरठा। तर आखिरम परमेश्वरक रिस हुँकन्हकम पररलन।

पावल थेसलोनिकीन्हकठे फेदोस्र जैना आपन इच्छा रहल बात बटोइठ

१७हेरो भैयौ, हमन एकघरिक लाग दुहनसे दूर हुइ परल, तर फे हमार मन त दुन्हककेसँग बा। दुहन आमनेसामने देख्ना हमार एकदम धेर चाहना रलकओसे हम्न दुन्हकठे जाइक लाग स्याकलसम कोसिस कर्ली। १८हम्न त दुन्हकठे जाइक लाग रलही – वास्तवम मै पावल झन् घरीघरी कोसिस कर्नु – तर शैतान हमन छेकदेहल। १९काकरकि जब हमार प्रभु येशू अइहीं, तब आशा ओ आनन्द कर्ना, ओ मुकुटा पैलकम



मुकुट पहिरल मनैया (२:१९)

+२.१५ अगमवक्तन: अगमवक्ता कलक परमेश्वरक वचन बोल्ना व्यक्ति हुइटा। थप जानकारीक लाग "अगमवक्ता /अगमवाणी" शब्दक अर्थ हेरो।

†२.१९ पावलक समयम असिन मुकुट विशेष किसिमक वनस्पतिले बनाजाए ओ खेलकुदम जितल मनैयह पुरस्कारक रुपम पहिराजाए।

थेसलोनिकीहूँकन २:२०-३:१२ ६

गर्व कर्ना कारण का हुई? का यी दुहहे नैहुइटो? २० जाट्टीसे हमार गौरव ओ आनन्द दुहहे हुइटो।

**पावल तिमोथीह थेसलोनिकीन्हकठे पठैलक कारण देठ**

३ आखिरम हम्न दुहनसे दूर होक रह नैस्याकलगली त, एथेन्सम सिलास ओ मै रना विचार कर्ली, २ ओ तिमोथीहजुन दुन्हकठे पठैली। उ हमार भैया हुइट ओ परमेश्वरक सेवकक् रुपम ख्रीष्टक बारेम खुशिक खबर प्रचार कठी। हम्न दुहन विश्वासम बलगर कराइक लाग ओ हौसला देहक लाग हुँकहीन पठैलही। ३ दुख पैलकम दुह कुइ फे हरेस जिन खैहो कना हमार चाहना रह। दुख त हम्न विश्वासिन्हक जीवनम अइबोकठा कना बात दुह जन्लबाटो। ४ काकरकि दुन्हकसँग रहल समयम हम्न सब जन दुख पउइयवाटी कैक घरीघरी कलही। हमार कहल बात ठ्याक्क लागल। यी त दुहन थाहाँ बा। ५ उहओसे, मै एको रह नैस्याक लगनु त, दुह विश्वासम बलगर पलबाटो कि नाहीं कैक बुझक लाग मै तिमोथीह दुन्हकठे पठैनहूँ। पापम फँसाइ खोजुइया, शैतान, कहीं दुहन फे फँसाक हमार परिश्रम बेकार कैदेहल कि कैक मै डरारनहूँ।

**तिमोथी थेसलोनिकीन्हकठेसे उत्साहजनक हालखबर लेक पावलकठे अइठ**

६ तर आव त तिमोथी दुन्हकठेसे घुम्क यिहाँ आरल ओ दुन्हक विश्वास ओ प्रेमक बारेम खुशिक खबर हमन सुनैला दुह हमन सड्ड प्रेमसे सम्झटो, ओ हम्न दुहन भँटना धेर चाहना करलअस दुह फे हमन भँटना धेर चाहना कर्लबाटो कना खबर उ देल। ७ उहओसे, हेरो भैया, दुन्हक विश्वासक खबर सुन्क हम्न आपन सारा दुखकष्टम फे हौसला पारखली। ८ काकरकि दुह प्रभुम स्थिर बाटो कैक हम्न सुन्ती त, हमन लौव जीवन पाइलअस लागल। ९ दुन्हक लाग हम्न परमेश्वरह जत्रा धन्यवाद चहैलसे फे नैपुगट! दुन्हक कारणले हम्न परमेश्वरक सामुन्ने धेर आनन्दक अनुभव कठीं। १० दुहनसे फेदोस्र भ्याँट कैक दुहन आकुर सिकाइसेकी ताकि दुन्हक विश्वासम ज्या ज्या बातक कमि बा, उ पूरा हुई कना उद्देश्यले हम्न रातदिन जोशसे प्रार्थना कठीं।

११ आव हमार परमेश्वर बाबा अपन्हे ओ हमार प्रभु येशू हम्न दुन्हकठे जैना डगर हमार लाग बनादेहीं, १२ ओ जौन हिसाबले हम्न दुहन प्रेम कठीं, उह हिसाबले प्रभु दुहन एक आपसम ओ

३.१ - प्रे १७:१५. ३.६ - प्रे १८:५.



## ७ थेसलोनिकीहुँकन ३:१३-४:१२

सबजहनसे प्रेमम झन्झन् बहैटीरहीं ओ भर्क फल्कना बनैहीं कना हमार प्रार्थना बा।<sup>१३</sup> उह प्रेमले टुन्हक मन अडिग हुई ताकि जब हमार प्रभु येशू आपन सारा पवित्र मनैन्हकसँग फेदोस्र अइहीं, तब टुह हमार परमेश्वर बाबक सामुन्ने निर्दोष ओ पवित्र हुइबो कना हमार प्रार्थना बा।

**पावल असल ख्रीष्टीयन जीवन जीना बारेम व्यवहारिक सल्लाह देठ**

✂ आखिरम, हेरो भैयौ, टुन्हक जीवन झन्झन् असल हुइटीजाए कैक प्रभु येशूक नाउँम हमार जोड्दार बिन्ती बा। परमेश्वरह मन पर्ना हिसाबले कसिक जीएपठा कैक हम्न टुहन सिखारख्ली, ओ हमार सिखाइलअस टुह जीटी फे बाटो।<sup>२</sup> काकरकि हम्न प्रभु येशूसे पाइल अधिकारले टुहन देहल निर्देशन टुह जन्लबाटो।

<sup>३</sup> परमेश्वर टुह पवित्र हुइल् चहठ, उहओसे व्यभिचारसे अलग रहो।<sup>४</sup> पवित्र ओ आदरणीय तरीकाले आपन गोसिनेसे जीवन बितैना बात हरेक व्यक्ति जानपठा।<sup>५</sup> परमेश्वरह नैचिहन्ना मनैन्हकअस कामवासनक

खराब विचार जिन करो।<sup>६</sup> असिन खराब काम कैक कुइ फे विश्वासीकमसे नाजायज फाइदा जिन लुटहो। परमेश्वर असिक करुइयनसे बदला लेठ। हम्न यी बातक बारेम टुहन पैल्हहैं गम्भीर चेतावनी देरख्ली।<sup>७</sup> काकरकि परमेश्वर हमन अपवित्र नाहीं, तर पवित्र जीवन बिताइक लाग बलैलह।<sup>८</sup> उहओसे यी निर्देशनह इन्कार करुइयन, मनैन नाहीं, परमेश्वरह इन्कार कठ, जौन परमेश्वर आपन पवित्र आत्मा टुहन देठ।

<sup>९</sup> एक आपसम प्रेम कर्ना बारेम टुहन लिख पर्ना आवश्यक नैहो, काकरकि एक आपसम प्रेम करपठा कैक त टुह परमेश्वरसे सिखरख्लो।<sup>१०</sup> वास्तवम, टुह सारा माकेडोनियक विश्वासीहुँकन प्रेम कठो। तर फे, हेरो भैयौ, आकुर धेर प्रेम कर्टीजाओ कैक हम्न टुहनसे बिन्ती करटी।<sup>११</sup> हम्न टुहन पैल्हहैं देहल निर्देशन अनुसार, शान्त जीवन बितैना, आपन-आपन कामम ध्यान देना, ओ आप्पन हाँठले कमैना धेर से धेर कोसिस करो।<sup>१२</sup> यदि टुह असिक कर्बो कलसे, ख्रीष्टम विश्वास

<sup>१४,४</sup> ग्रीक भाषक स्रोतमसे यी पदह अनुवाद कर्ना और सम्भावित तरीका: पवित्र ओ आदरणीय तरीकाले आपन शरीरह अधीन कर्ना बात हरेक व्यक्ति जान पठा।


## थेसलोनिकीहूँकन ४:१३-५:५

८

नैकरुइयन फे टुन्हक आदर करहीं, ओ टुहन केक्रोम फे भर पर नैपरी।

पावल येशू ख्रीष्ट जब फे आइसेकना  
हुइलकओसें थेसलोनिकीहूँक  
सचेत रहपर्ना बारेम सिखैठ

१३ हेरो भैयौ, मुस्याकल विश्वासीन का हुहीन् कना बारेम टुह बात बुझल हम्न चहठी, ताकि टुहन आशा नैरना मनैन्हकअस शोक कर नैपरी। १४ काकरकि हम्न येशू मुल ओ फेदोस्र जीयागैल कैक विश्वास कठीं, ओ येशू फेदोस्र अइहीं त, मुनासे आघ येशूकम विश्वास करल मनैन परमेश्वर फेदोस्र जीयादेहुइया बाट ओ उहाँकसँग अनुइया बाट। १५ प्रभुक देहल वचन हम्न टुहन देठी, कि प्रभु फेदोस्र अइना दिनसम हम्न जीटीह रहुइयन उ मुवल मनैनसे आघ उहाँह नैभैटैनेहुइटी। १६ काकरकि प्रभु अपन्हे



तुरही (४:१६)

हुकुम गुञ्जटी स्वर्गसे अउइया बाट। उह समयम मुख्य स्वर्गदूतक बरा आवाज अउइया बा ओ परमेश्वरक तुरही बजैलक आवाज सुन्जउइया बा। ख्रीष्टकम विश्वास कैक मुवुइयन सबसे आघ जीयाजउइया बाट। १७ तब हुँकन्हक सँगसँग प्रभुह आकाशम भेटाइक लाग हम्न जीटीह रहुइयन बद्रीम उठाजउइया बाटी। असिक हम्न सड्डभर प्रभुकसँग रहुइया बाटी। १८ उहओसें यी वचनले एक औरजहन हौसला देटीरहो।

५ हेरो भैयौ, प्रभु कैहया ओ कत्राजुन अइहीं कना बारेम टुन्हक लाग लिखदेहपर्ना आवश्यक नैहो। २ काकरकि प्रभुक अइना दिन त रात्क चोच्वा आइअस सुटुक्क अउइया बा कैक टुहन पूरा थाहाँ बा। ३ मनै “शान्ति ओ सुरक्षा” कटीरहल समयम, गर्भवती जन्नीमनैयह व्याथा लागअस, हुँकन्हकम विपत्ती एकचोट्टे अउइया बाटन, ओ हुँक उम्क नैपैनेहुइट! ४ तर हेरो भैयौ, टुह यी बातक बारेम अन्धकारम नैहुइटो। उहओसें प्रभु अइना दिन टुहन चोच्वाअस चकित नैपर्ने हो। ५ काकरकि टुह सब जन अजरारक ओ दिनक सन्तान हुइटो। हम्न रातिक ओ अन्धकारक सन्तान नैहुइटी।+

\*५.५ यी सन्दर्भम अजरार कलक धार्मिकता, ज्ञान, मुक्ति या परमेश्वर हुइसेकी।

४.१५-१७ - १ कोर १५:५१-५२. ५.२ - मत्ती २४:४३; लूक १२:३९; २ पत्र ३:१०.

६ उहओसे हम्न औरजन्हकअस सुत नैपरट, तर जागा रहपठा ओ अपन्हेह अनुशासनम ढरपठा। ७ सुतुइयन रात्क सुलठ ओ मत्वरेन फे रात्क जो मत्वार हुइठ। ८ तर हम्न त दिनक सन्तान हुइलकओसे, हम्न अनुशासनम पलरही। विश्वास ओ प्रेमह छातीपाताअस, ओ मुक्तिक आशह टोपअस पहिके सुरक्षित रही। ९ काकरकि परमेश्वर हमारम आपन रिस झारक लाग नाहीं, तर प्रभु येशू ख्रीष्टद्वारा हमन मुक्ति देहक लाग रोज्लह। १० येशू हमार लाग मुल ताकि हम्न चाहा जीटीह रही, चाहा



छातीपाता ओ टोप पहिरल  
सिपाही (५:८)

मुवल रही, हम्न उहाँकसँग जीएपाई। ११ उहओसे एक औरजहन उत्साह देना ओ विश्वासम बलगर बनैना काम करो, जौन काम तुह कटीं फे बाटो।

### पावल ख्रीष्टीयन जीवन परमेश्वरह आदर देना हिसाबक हुइपठा कैक सिखैठ

१२ हेरो भैयौ, हम्न बिन्ती करटी, कि तुन्हक बीचम दिलोज्यानले प्रभुक काम कर्ना ओ तुहन निर्देशन देना अगुवन आदर करो। १३ हुँकन्हक कर्लक कामक लाग हुँकन प्रेमसे धेर आदर ओ सम्मान करो। ओ एक आपसम मेलमिलापम रहो।

१४ हेरो भैयौ, अल्छी मनैन चेतावनी देओ, हरेस खैना मनैन साहस देओ, कमजोर मनैन सहायता करो, ओ सबजहनसे सहनशीलता देखाओ कैक हम्न तुहनसे बिन्ती करटी। १५ खराबीक बदला खराबी कुइ फे जिन कर, तर एक औरजन्हक ओ सबजन्हक भलाई कर्ना कोसिस करो।

१६ सड्ड आनन्दित रहो। १७ प्रार्थना कटींरहो। १८ सब परिस्थितिम धन्यवाद चहाओ, काकरकि तुह ख्रीष्ट येशुकम विश्वास करुइयन्हक लाग परमेश्वरक इच्छा यिह हो।

## थेसलोनिकीहूँकन ५:१९-२८

१०

१९ पवित्र आत्मक कामह जिन रोको। २० अगमवाणीह हेल्हा जिन करो। २१ तर सब कहल बातक जाँच करो ओ असल बातह पक्रलरहो। २२ सब किसिमक खराबीमसे अलग रहो।

२३ शान्ति देहुइया परमेश्वर अपन्हे टुहन सम्पूर्ण हिसाबले पवित्र बनैहीं, ओ हमार प्रभु येशू ख्रीष्ट फेदोस्र नैआइटसम टुन्हक आत्मा, प्राण+ ओ शरीर निर्दोष ह्वाए कना हमार आशा बा। २४ परमेश्वर जो

यी सब करुइया बाट, काकरकि टुहन बलुइया परमेश्वर विश्वासयोग्य बाट।

२५ हेरो भैयौ, हमार लाग फे प्रार्थना कैदेहो। २६ सबजहन पवित्र प्रेमले जयमसिह करहो।

२७ मै टुहन प्रभुक नाउँम आज्ञा देहुँ, कि यी चिठी पहरक सबजहन सुनादेहो।

२८ हमार प्रभु येशू ख्रीष्टक अनुग्रह टुन्हकसँग पलरह।

+५.२३ आत्मा, प्राण: बाइबलम आत्मा ओ प्राण अल्लौना मुस्किल बात हो। उ दुनु चिजह सँगसँग व्यक्तिक एकठो द्याख नैसकिजना भागक रुपम बुझ सकिजटा। उ दुनु चिजह 'मन' जसिन चिज केक बुझ सकिजटा।

# थेसलोनिकीहुँकन

पावलक लिखल द्वासर चिठी

## चिठीक परिचय

थेसलोनिकीहुँकन पैल्ह चिठी लिखलक कुछ समय पाछ पावल हुँकन द्वासर चिठी लिखलह। पावलक पैल्ह लिखल चिठीले कुछ विषयम त काम करल। उदाहरणक लाग, उ पैल्हक चिठीम आपन नियत, उद्देश्य, व्यवहार ओ सन्देशम छलकपट नैरहल बात लिखल, जौन बात हुँकाहार लिखल द्वासर चिठीम दोह्याइल नैहो। तर पैल्हक चिठीम लिखल हरेक विषय थेसलोनिकीहुँकन मजासे पालन नैकर्ल जसिन देखपठा।

थेसलोनिकक मण्डलीम प्रभु येशू ख्रीष्ट फेदोस्र अइना विषयम वादविवाद रलहन। उ वादविवादक कारण मण्डलीम समस्या होरलहन। हुइना त, येशू ख्रीष्ट फेदोस्र अइना विषयम पावल पैल्हकके चिठीम लिखरखलह। तर पैल्हक लिखल चिठीले उ वादविवाद समाधान नैहुइलन जसिन देखपठा। उहओसे, पावल हुकन्हक बुझाइह सुधार करक लाग द्वासर चिठी लिखलह। पावल यी चिठीम येशू ख्रीष्ट अवस्य फेदोस्र अउइया बाट ओ सबजन्हक न्याय करुइया बाट, तब हरेक व्यक्ति आपन करल काम अनुसारक फल पउइया बा कैक बटोइठ। तर यी हुइनासे आघ व्यवस्था भङ्ग कर्ना व्यक्ति आक अपन्हेह परमेश्वर घोषणा करुइया बा, ओ चमत्कार फे देखुइया बा कना बात चिठीम उल्लेख कैगिल बा।

पावल द्वासर चिठीम धेरजसिन येशू ख्रीष्ट फेदोस्र अइना बारेम लिखरखल। थेसलोनिकीहुँकन येशू ख्रीष्ट फेदोस्र अइना बारेम गलती बुझलक कारण कुई कुई अल्छी होरलह। पावल हुँकन काम कर्ना आपन उदाहरण पालन कर कैरखल ओ अटेर कर्ना मनैनसे करपर्ना व्यवहारक बारेम फे निर्देशन देरखल। जे होस्, पावल यी चिठीम विश्वासीहुँकन जीवनम दुखकष्ट परिआगैलसे फे खुशिक खबरम अडिग रहपर्ना ओ आपन खाइक लाग अपन्हे कमाइ पर्ना आवश्यकता देखारखल।

## विषयसूचि

पावल थेसलोनिका शहरम रहल मण्डलीह चिठी लिख्ठ (१:१-२)

पावल येशू ख्रीष्ट फेदोन्न अउइया बाट ओ न्याय करइया बाट कैक बटोइठ  
(१:३-१२)

पावल येशूसे आघ व्यवस्था भङ्ग करइया व्यक्ति अउइया बा कैक सिखैठ  
(२:१-१२)

पावल विश्वासीहुँक खुशिक खबरम अडिग रहपठा कैक सिखैठ (२:१३-१७)

पावल विश्वासीहुँकनसे प्रार्थनक लाग अनुरोध कठ (३:१-५)

पावल सब जन काम करपठा कैक सिखैठ (३:६-१५)

चिठीक अन्तिम भाग (३:१६-१८)

### पावल थेसलोनिका शहरम रहल मण्डलीह चिठी लिख्ठ

१ हमार परमेश्वर बाबा ओ प्रभु येशू ख्रीष्टक थेसलोनिकाम रहल मण्डलीह हम्र पावल, सिलास ओ तिमोथी यी चिठी लिखटी।<sup>+</sup> २ परमेश्वर बाबा ओ प्रभु येशू ख्रीष्ट दुँहन अनुग्रह<sup>†</sup> ओ शान्ति देहीं।

### पावल येशू ख्रीष्ट फेदोस्र अउइया बाट ओ न्याय करुइया बाट कैक बटोइठ

३ हेरो भैयौ, हम्र दुन्हक लाग परमेश्वरह धन्यवाद चहैही पठी। ओ यी ठीक फे हो, काकरकि दुन्हक विश्वास एकदम धेर बाहल बा ओ एक आपसम दुह हरेकजन्हक प्रेम फे झन्झन् बहटीगैरहल।<sup>४</sup> उहओसें हम्र दुन्हक बारेम परमेश्वरक और मण्डलीम गर्व कैक बोलठी। हम्र खास कैक सतावट ओ दुखकष्टम दुन्हक सहना शक्तिक ओ विश्वासक बारेम गर्व कठीं।

५ परमेश्वर यिह दुखकष्टह प्रयोग कैक आपन न्याय प्रमाणित करुइया बाट। उहाँ दुहन उहाँक राज्यम जैना योग्य बनैटीबाट। ओक्र लाग त दुह दुख भ्वागटो।<sup>६</sup> परमेश्वर ठीकसे न्याय कठ, उहाँ दुहन दुख

देहुइयन दुख देहुइया बाट,<sup>७</sup> ओ दुह दुख भोगुइयन ओ हमन सुख देहुइया बाट। यी काम तब हुई, जब प्रभु येशू आपन शक्तिशाली स्वर्गदूतन्हकसँग आगिक लहरम स्वर्गमसे देखपरहीं।<sup>८</sup> परमेश्वरह नैचिहन्ना मनैन ओ हमार प्रभु येशू ख्रीष्टक बारेमा सुनागैल खुशिक खबरह नैटेर्ना मनैन उहाँ दण्ड देहुइया बाट।<sup>९</sup> हुँक प्रभुक उपस्थिति ओ उहाँक शक्तिशाली तेज अजरारमसे निक्रावापैहीं ओ सड्डभरिक लाग नाश कैजहीं।<sup>१०</sup> यी तब हुई, जब प्रभु येशू फेदोस्र अइहीं। उ दिन उहाँ आपन पवित्र मनैनसे ओ सारा विश्वासीनसे आदर ओ प्रशंसा पउइया बाट। उ बगालम दुह फे रबो, काकरकि दुह हमार कहल बातम विश्वास कर्लो।

११ उहओसें हम्र दुन्हक लाग प्रार्थना कैदेटीरठी। परमेश्वर दुहन जौन जीवनक लाग बलैल, उहाँ दुहन वाकर योग्य बनैहीं, ओ उहाँक शक्तिले हरेक असल उद्देश्य ओ विश्वासक काम करक लाग सहायता करहीं कैक हम्र उहाँसे कठी।<sup>१२</sup> तब दुन्हक चालचलनक कारण हमार प्रभु येशूक नाउँक आदर हुउइया बाटन, ओ दुह फे उहाँकसँग आदर पउइया बाटो।

<sup>+</sup>१.१ १ थेसलोनिकी १:१ म रहल फुटनोट हेरी।

<sup>†</sup>१.१ अनुग्रह: १ थेसलोनिकी १:१ म रहल फुटनोट हेरी।

१.१ - प्रे १७:१. १.९ - यशै २:१०.

हमार परमेश्वर ओ प्रभु येशू ख्रीष्टक अनुग्रहक कारणले यी सब सम्भव बा।

**पावल येशूसे आघ व्यवस्था भङ्ग करुइया व्यक्ति अउइया बा कैक सिखैठ**

**२** हेरो भैयौ, आब हमार प्रभु येशू ख्रीष्ट फेदोस्र अइना ओ हम्र उहाँह भेटाइक लाग जम्मा हुइना विषयम स्पष्ट हुई। हम्र दुहनसे बिन्ती करटी कि, २ यदि कुई प्रभुक अइना दिन पुगरलन कही कलसे, दुह चिन्ता जिन करहो या विचलित जिन हुइहो। उ दिनिक बारेम हम्र अगमवाणी ब्वालबेर, या प्रचार करबेर ओसिक कली हुँ कैक कुई दाबी कर सेकठ, या कुई हमार नाउँ पार्क लिखल चिठी पठाइ फे सेकठ, तर हुँकन्हक बातम विश्वास जिन करहो। ३ हुँक्र ज्या कलसे फे, हुँकन्हक उल्कम जिन लगहो। काकरकि परमेश्वरक विरोधम अन्तिम विद्रोह नैहुइटसम, ओ व्यवस्था भङ्ग करुइया ओ नाश हुइइया व्यक्ति नैदेखपरट्सम उ दिन अउइया नैहो। ४ उ व्यक्ति मनै परमेश्वर मान्क पुज्जक सब चिजिक विरोध करुइया बा ओ अपन्हेह सबसे उच्च घोषणा करुइया बा। अत्र केल नैहोक, उ परमेश्वरक मन्दिरम समेत बैठइया बा ओ "परमेश्वर मैहे हुइट्ट" कहइया बा।

५ यी विषयम त, दुन्हक्केसँग रहलम मै दुहन सिखैनहुँ। दुहन याद नैहो का? ६ दिन पुग्लसे उ दुष्ट देखपरुइया जो बा। आब का चिज ओहीह रोकलवाटस् कना बात त दुह जन्लबाटो। ७ व्यवस्था भङ्ग करुइया गोप्य रुपम पैल्हैँ आपन काम शुरु कैराखल। तर ओहीह रोकुइयह नैहटाजाइट्सम उ रोकजैलरहुइया बा। ८ तबदोस्र व्यवस्था भङ्ग करुइया व्यक्ति देखपरुइया बा। तर प्रभु येशू तेज अजरारम आक आपन मुहक एक्क साँसले ओहीह नाश कैदेहुइया बाट। ९ व्यवस्था भङ्ग करुइया व्यक्ति शैतानक शक्ति लेक अउइया बा, ओ सब किसिमक चमत्कार ओ अचम्म-अचम्म काम कर्लक बहाना बनुइया बा। १० उ हरेक किसिमक छल कैक नाश हुइना सबजहन धवाखा देहुइया बा, काकरकि हुँक्र मुक्ति देना सत्य वचनह प्रेम कर ओ स्वीकार कर नैचहल। ११ उहओसे, हुँक्र झुठ बातम विश्वास करहीं कैक परमेश्वर हुँकन भर्मेना शक्ति पटुइया बाट। १२ हुँक्र सत्य वचनम विश्वास नैकैक दुष्ट चालचलनम खुसी हुइलकओसे हुँक्र दोषी ठहाजउइया बाट।

२.१ - १ थेस ४:१५-१७.

२.४ - दान ११:३६; इज २८:२.

२.८ - यशै ११:४.

२.९ - मत्ती २४:२४.



### पावल विश्वासीहुँकन खुशिक खबरम अडिग रहपठा कैक सिखैठ

१३ प्रभुक प्रेम करल भैयौ, हम्र टुन्हक लाग परमेश्वरह सड्ड धन्यवाद चहैही पठा, काकरकि परमेश्वर शुरुहम टुहन मुक्ति देहक लाग रोज्ल। उ मुक्ति टुहन पवित्र बनैना पवित्र आत्मासे ओ सत्य बातम टुन्हक करल विश्वाससे अइठा। १४ हम्र टुहन प्रचार करल खुशिक खबरह माध्यम बनाक परमेश्वर टुहन बलैलह। टुह फे हमार प्रभु येशू ख्रीष्टकअस आदर पाइसेको कैक उहाँ टुहन बलैलह। १५ उहओसे, हेरो भैयौ, विश्वासम बलगर होओ, ओ चाहा मुहक वचनले ह्वाए, चाहा लिखल चिठीले ह्वाए - हमार सिखाइल बात पकरलरहो।

१६ आब हमन प्रेम करइया ओ अनुग्रहद्वारा हमन सड्डभर उत्साह ओ असल आशा देहुइया हमार प्रभु येशू ख्रीष्ट अपन्हे ओ परमेश्वर बाबा १७ टुहन उत्साह देटीरहीं, ओ हरेक असल काम ओ वचनम टुहन शक्ति फे देटीरहीं।

### पावल विश्वासीहुँकनसे प्रार्थनक लाग अनुरोध कठ

३ आखिरम, हेरो भैयौ, हमार लाग फे प्रार्थना कैदेहो, ताकि प्रभुक वचन, टुन्हक बीचम फैललअस,

चारिओर झट्ट फैल स्याक ओ याकर धेर आदर ह्वाए। २ ओ हम्र खराब ओ दुष्ट मनैनसे छुटकारा पाइसेकी, काकरकि सब जन त विश्वास नैकटी। ३ तर प्रभु विश्वासयोग्य रलकओसे उहाँ टुहन बलगर बनइया बाट ओ दुष्टसे+ रक्षा करइया बाटा। ४ ओ प्रभुक कारणले टुह हमार कहल बात मन्टीबाटो ओ मन्टीरहुइया बाटो कैक हमार विश्वास बा। ५ प्रभु जो टुहन परमेश्वरक प्रेम बुझना ओ ख्रीष्टकअस धैर्य धारण कर्ना शक्ति देहीं।

### पावल सब जन काम करपठा कैक सिखैठ

६ हेरो भैयौ, प्रभु येशू ख्रीष्टक नाउँम हम्र टुहन आज्ञा देहटी, कि अल्ली विश्वासीनसे ओ हमार सिखाइल वचन अनुसार नैचलुइयनसे अलग रहो। ७ काकरकि कसिक हमार देखासिकी करपठा कना बात त टुह जन्लबाटो। हम्र टुन्हकसँग रहलम अल्ली नैरलही, ८ पैसा बिना तिर्ल हम्र केकरो घर फे नैखैली। बेनसे, टुह किहुह फे भार जिन पर कैक हम्र रातदिन खटक काम कर्ली। ९ सहायता पैना हमार हक नैहोक नैहो, तर टुन्हक बीचम एकठो उदाहरण बनक लाग हम्र ओसिक कर्लही। १० "यदि कुई काम

\* ३.३ शैतानसे कहल हो।

थेसलोनिकीहुँकन ३:११-१८

१६

नैकरट् कलसे, उ खैना फे जिन खाए" कैक त हम्न टुन्हक्केसँग रहलम कलही।

११ टुह्ममध्ये कुई कुई त अल्ल्ही बाटो कैक सुन्मिल्ला। हुँक कामक नाउँम एकठो सिँका फे नैउठैट, तर आनक कामम भर लबलब-लबलब हाँठ करैठ। १२ हम्न असिन मनैन प्रभु येशू ख्रीष्टक नाउँम आज्ञा ओ अर्ती देहटी, कि हुँक आपन खाइक लाग अपन्हे खुरुखुरु काम करहीं। १३ हेरो भैयौ, भलाई कर्ना कामम पाछ जिन हटो।

१४ यी चिठीम हमार लिखल वचन जे पालन नैकरट्, ओहीह चिन्हलरहो, ओ ओहीसे संगतऽ जिन करो, त उ

अपन्हे शरमम परी। १५ तर फे ओहीह शत्रुऽ जिन थनहो, बेनसे भैया मान्क चेतावनी देहो।

### चिठीक अन्तिम भाग

१६ शान्ति देहुइया प्रभु अपन्हे हर समयम हर किसिमले टुहन शान्ति देटीरहहीं। प्रभु टुह सबजन्हकसँग रहीं।

१७ मै पावल आप्पन हाँठले जयमसिह लिख्क पठाइदुँ। म्वार सक्कु चिठीक चिनारी यह हो। मै असहँक लिखुँ।

१८ हमार प्रभु येशू ख्रीष्टक अनुग्रह टुह सबजन्हकसँग पलरह।

# तिमोथीह

## पावलक लिखल पैलह चिठी

### चिठीक परिचय

तिमोथी एशिया क्षेत्रक एक जवान ख्रीष्टीयन रलह। हुँकाहार डाई यहूदी जातिक ओ हुँकाहार बाबा ग्रीक जातिक रलह। प्रचार कर्ना कामम ऊ पावलक सँगसँग गैल ओ हुँकहिन सहायता कर्लह। पावल यी चिठीम तीन मुख्य बातक बारेम लिखल।

यी चिठीम मण्डलीम फैलल झूटा शिक्षासे होशियार रहपर्ना बारेम लिखल बा। असिन झूटा शिक्षा यहूदी विचार ओ अयहूदी विचार मिल्ल बनल शिक्षा हो। उ शिक्षा अनुसार मनै नुकल खास ज्ञान नैपाइत्सम, कत्रा खैनापिना बातम रोक नैलगाइत्सम, भ्वाजविहा कर नैछवारट्सम वास्तविक मुक्ति नैपैट।

यी चिठीम मण्डलीम प्रशासन चलैना बारेम, सेवा सञ्चालन कर्ना बारेम, एल्डर ओ डिकनहुँकन्हक चालचलनक बारेम अर्ती देगैल बा।

अन्तम येशू ख्रीष्टक असल सेवक बनक लाग तिमोथीह सल्लाह देगैल बा।

### विषयसूचि

अभिवादन (१:१-२)

झूटा शिक्षासे होशियार रहपर्ना बात (१:३-११)

पावलह प्रभुक अनुग्रह (१:१२-२०)

आराधना कर्ना बारेम शिक्षा (२:१-१५)

मण्डलीक अगुवाहुँक (३:१-१६)

तिमोथीह निर्देशन (४:१-१६)

विधवा, एल्डर ओ कमरान्हक बारेम सल्लाह (५:१-६:२)

धनसम्पत्तिक मोह (६:३-१०)

तिमोथीह पावलक आदेश (६:११-२१)



### अभिवादन

१ हमन मुक्ति देना परमेश्वर ओ आशा देना ख्रीष्ट येशूक आज्ञा अनुसार नियुक्त हुइल् मै पावल, ख्रीष्ट येशूक प्रेरित, यी चिठी २ म्वार साँचो आत्मिकी छावा तिमोथीह लिखटु। परमेश्वर बाबा ओ हमार प्रभु ख्रीष्ट येशू टुहिन अनुग्रह, दया ओ शान्ति देहीं।

### झूटा शिक्षासे होशियार रहपर्ना बात

३ मै माकेडोनिया जाइबेर टुहिन एफिसस शहरम रहक लाग कनहुँ ओ आब फेदोस कहटु, कि टुँ उहँ पलरहो ओ झूट शिक्षा सिखैना मनैन कर्ना आज्ञा देओ। ४ हुँक अर्थनाबर्थक बट्कोहीम ओ कबु नैओरैना वंशावलीम जिन अलमलैहीं कैक हुँकन आज्ञा देओ। ओसिन बातले वादविवाद केल अनैठा, ओ परमेश्वरकम विश्वास कर्लक जीवन जीएक लाग किहुह कुछु सहायता नैकरट। ५ म्वार देहल निर्देशनक उद्देश्य त सब विश्वासीहुँक प्रेम करहीं कना हो, जौन प्रेम शुद्ध हृदय, असल विवेक ओ सक्कली विश्वाससे उत्पन्न हुइठा। ६ तर कत्रा जन यी सब बात छोरक फोगटिया गफम अलमलाइल् बाटा। ७ हुइना त हुँक मोशक व्यवस्था सिखैना शिक्षक हुइखोजठ, तर हुँक

अपन खूब जन्नाहाअसक कर्लसे फे, आपन बट्वाइल् बात अपन्हे नैजन्ट।

८ ठीकसे चलैलसे व्यवस्था असल हो कना बात हमन थाहाँ बा। ९ हमन यी फे थाहाँ बा, कि व्यवस्था असल मनैयक लाग बनल नैहो, तर कानून उल्लङ्घन करुइयन्हक लाग ओ अपराधीन्हक लाग, परमेश्वरह नैमनुइयन्हक लाग ओ पापीन्हक लाग, दुष्ट ओ अधर्मीन्हक लाग, आपन डाई-बाबक हत्या करुइयन्हक लाग, औरजन्हक हत्या करुइयन्हक लाग बनल हो। १० अत्र केल नैहोक, व्यवस्था त व्यभिचारीन्हक लाग, समलिङ्गीन्हक लाग, मानव बेचबिखन करुयन्हक लाग, झूट बोलुइयन्हक लाग, झूट किरिया खउइयन्हक लाग, ओ सत्य सिद्धान्तक विरोधम हुइना और कौनो कामक लाग फे बनल हो। ११ सत्य सिद्धान्त यह हो, जौन परमधन्य परमेश्वर महीह सुम्पलक महिमित खुशिक खबर अनुसार बा।

### पावलह प्रभुक अनुग्रह

१२ म्वार कामम महीह बल देना हमार प्रभु ख्रीष्ट येशूह मै धन्यवाद देठ। उहाँ महीह विश्वास कैक जो आपन कामम लगैलह। १३ हुइना त मै पैल्ह प्रभुक अनादर कर्नु ओ एक्को फे दया

नैकैक उहाँक मनैन सतैनु, तर परमेश्वर महीह दया कर्ल, काकरकि उ ब्याला मै विश्वास नैकर्लरनहुँ ओ यी सब काम मै अनजानम कर्नहुँ। १४ ओ हमार प्रभु ख्रीष्ट येशू अत्रा अनुग्रही रलह, कि उहाँ महीह विश्वास ओ प्रेमले भरिपूर्ण बनैल।

१५ यी सत्य वचन हो, ओ सब जन यहीह स्वीकार करपठा: ख्रीष्ट येशू पापी मनैन बचाए जो यी संसारम अइलह। ओ सबसे बढ़ता पापी मै हुइट। १६ तर मै सबसे बढ़ता पापी रलसे फे परमेश्वर महीह दया कर्ल ओ ख्रीष्ट येशू महीह महान धैर्य देखैलक एकठो उदाहरण महीह हुइदेला। औरजन फे ख्रीष्टकम विश्वास करहीं ओ अनन्त जीवन पैहीं कैक उहाँ यी काम कर्ल। १७ परमेश्वरह सारा आदर ओ मान सड्डभर हवाए। उहाँ अनन्तकालसम रना राजा हुइट, जे कब्बु नैमुट, ओ नैदेखपटा। उहाँ केल परमेश्वर हुइटा। आमेन।

१८ म्वार छावा तिमोथी, टुहार बारेम पैल्हहैं कैगिल् अगमवाणी अनुसार मै तुहिन यी निर्देशन देहट। यदि टुँ यी निर्देशन पालन कर्बो कलसे, प्रभुक युद्धम टुँ मजासे लडाई कर सेकबो। १९ विश्वासयोग्य होओ ओ असल विवेक कायम करो। कुई-कुई

मनै विवेक अनुसार नैचल्लक कारण आपन विश्वास गुमाडर्ल। २० हुँकमध्ये दुइ जन त हुमेनियस ओ अलेक्जेन्डर हुइटा। हुँक परमेश्वरक बदनाम कर छोरहीं कैक मै हुँकन शैतानक हाँठम सुम्पदेरख्नु।

### आराधना कर्ना बारेम शिक्षा

२ आब सबसे पैल्ह मै कहटु, कि सारा मनैन्हक लाग बिन्तीभाउ, प्रार्थना, अन्तरबिन्ती ओ धन्यवाद परमेश्वरह चहैना काम करपठा। २ राजा ओ सरकारक मनैन्हक लाग फे प्रार्थना करो, तब हम्र परमेश्वरक आराधना ओ आदर कर्ती सुखशान्तिम जीवन बिताइ पैबी। ३ असिक प्रार्थना कर्ना मजा हो ओ हमन मुक्ति देना परमेश्वर फे यिह मन परैठ। ४ परमेश्वर सारा मनै मुक्ति पाइल ओ सत्य बात बुझल चहठ। ५ काकरकि परमेश्वर एकठो केल बाट ओ हमन परमेश्वरकठे अन्ना मनैया फे एकठो केल बाटा। उ मनैया ख्रीष्ट येशू हुइटा। ६ उहाँ म्वाल तिक सबजहन छुटकारा देहक लाग अपन्हेह बलिदानक रुपम देल। परमेश्वर यी गवाही संसारह ठीक समयम देल। ७ यीह बातक प्रचार करक लाग परमेश्वर महीह एकठो प्रचारक ओ

प्रेरित हुइक लाग रोज्लह। अयहूदीहुँक येशूकम विश्वास करहीं कना उद्देश्यले हुँकन सत्य बात सिखाइक लाग उहाँ महीह पठैलह। मै बढाइचढाइ नैकरठुइटु - सत्य बात केल कहटु।

८ आराधना कर्ना हरेक ठाउँम, पुरुषहुँक रिस ओ वादविवाद विना कर्ल आपन पवित्र हाँठ स्वर्गओर उठाक प्रार्थना करल मै चहटु।

९ ओसहँक महिलाहुँक फे सिदासादा पहिरणम रहल मै चहटु। हुँक सुहैना हिसाबले लुगा लगाइपर्ठा, ठिस पार्क झौंटी पर्ना, स्वान, मोतीक गरगहना ओ दामी-दामी लुगा लगाक अपन्हेह आकर्षित नैपारपरटु। १० तर असल कामले अपन्हेह सँप्राइपर्ठा। यिहींले परमेश्वरक भक्ति कर्तु कना महिलाहुँकन सुहावन बनैठा।

११ महिलाहुँक अधीनम रहक चूपचाप सिखपर्ठा। १२ महिलाहुँक पुरुषहुँकन सिखैना ओ अधिकार जमैना बातम मै अनुमति नैदेटु। हुँक चूप रहपर्ठा। १३ काकरकि परमेश्वर पैल्ह आदमह बनैलह, तबदोस्र हव्वह बनैलह। १४ शैतानक छलम आदम नैपर्ल, तर छलम पर्क परमेश्वरक

आज्ञा भङ्ग करइया त हव्वा जो रलही। १५ तर फे, यदि महिलाहुँक नम्र होक विश्वासम, प्रेमम ओ पवित्रताम पलरहहीं कलसे, लर्का जन्माइबेर हुँक मुक्ति पैहीं।+

### मण्डलीक अगुवाहुँक

३ यदि कुई मण्डलीक रेखदेख कर्ठा कलसे, उ मजा विचार हो। यी एकदम सत्य बात हो। २ मण्डलीक रेखदेख कर्ना मनैया कुई फे दोष लगाइ नैसेकना जीवन जीएपर्ठा, ओ आपन गोसिन्याप्रति विश्वासयोग्य हुइपर्ठा। ऊ अपन्हेह वशम ढर सेकना, समझदार, असल चालचलन रहल, मनैन स्वागतसत्कार कर्ना ओ औरजहन सिखाइसेकना हुइपर्ठा। ३ ऊ मत्वन्या, झनक्क रिसैना हुइ नैपरटु, बेनसे सहना हुइपर्ठा। ऊ झगरा नैकर्ना ओ धनक ल्वाभ नैकर्ना हुइपर्ठा। ४ ऊ आपन घर मजासे चलाइ सेकना हुइपर्ठा, ओ हुँकाहार लर्कापर्का कहल मन्ना ओ हुँकाहार आदर कर्ना हुइपर्ठा। ५ काकरकि आपन घरपरीवारह मजासे तह लगाइ नैसेकना मनैया परमेश्वरक

\* २:१५ सायद यी पद उत्पत्ति ३:१६ से सम्बन्धित बा। आदमह पाप कर लगुइया हव्वा रलही। ऊ लर्का जन्माइबेर शरीरम धेर दुख पैलसे फे, आत्मिक रूपले मुक्ति पैहीं।

† ३:२ "आपन गोसिन्याप्रति विश्वासयोग्य हुइपर्ठा" -- याकर और अर्थ यी फे हुइसेकटा: यदि ऊ भ्वाज कैरखल कलसे, हुँकाहार एकठो गोसिन्या हुइपर्ठा।

२:७ - २ तिमो १:११.

२:९ - १ पत्र ३:३.

२:१३ - उत २:७, २१-२२.

२:१४ - उत ३:१-६.

३:२-७ - तीत १:६-९.

मण्डलीक रेखदेख कसिक कर सेकी?  
 ६ ऊ भक्खरिक विश्वास करल सिखारु  
 फे नैहुइपरट्, नकि त ऊ घमण्डले  
 फुल्क शैतानकअस दण्डम पर्क नाश  
 हुई। ७ मण्डलीसे बाहर रहल मनैनसे  
 फे ऊ आदर पाइल् हुइपठा। तब केल  
 हुँकाहार बदनाम नैहुइहीन ओ शैतानक  
 जालम फे नैपरहीं।

८ ओसहँक डिकन+ होक सेवा  
 करुइयन असल चालचलन रहल  
 हुइपठा। ऊ बतचिफ्लार, मत्वन्या,  
 ओ धनक लोभी हुइ नैहुइपरट्। ९ हुँक  
 परमेश्वरक प्रकट करल सत्य बातह  
 शुद्ध विवेकले पकलरहपठा। १० पैल्ह  
 त हुँकन्हक मूल्याङ्कन हुइपठा। यदि  
 ठीक ठहर्ल कलसे, हुँक डिकन होक सेवा  
 कर सेकठ।

११ ओसहँक हुँकन्हक गोसिनेन्ा फे  
 असल चालचलन रहल, आनक बदनाम  
 नैकर्ना, अपन्हेह अधीनम ढर्ना ओ सब  
 बातम विश्वासी हुइपठा।

१२ हरेक डिकन आपन गोसिन्याप्रति  
 विश्वासयोग्य हुइपठा। ऊ आपन  
 लर्कापर्कन ओ आपन घरपरिवारन  
 मजासे चलाइपठा। १३ डिकन होक  
 मजासे सेवा करुइयन बरा इज्जत  
 कमैहीं ओ ख्रीष्ट येशूकम आपन करल

विश्वासक बारेम फे औरजहन साहससे  
 कह सेक्ना क्षमाता पैहीं।

१४ मै टुँहारठे झट्ट अइना आशा  
 कैरखनु, तर फे यी निर्देशन टुहिन  
 लिखटु, १५ ताकि यदि मै अइना ढिल  
 करम कलसे, परमेश्वरक घरानक मनै  
 एक-औरजहनसे करपर्ना व्यवहार  
 टुँ यहि चिठी मार्फत जन्लरहो।  
 यी घराना त जीवित परमेश्वरक  
 मण्डली, सत्य सन्देशक खुँटा ओ जग  
 हो। १६ परमेश्वरक प्रकट करल सत्य  
 सन्देश अचम्मक बा कना बातह कुइ  
 फे इन्कार कर नैस्याकट्:

उहाँ मनैया होक प्रकट हुइल,  
 उहाँ सड्डभर ठीक काम करल  
 बात पवित्र आत्मा देखादेल,  
 स्वर्गदूतहुँक उहाँह देखल,  
 जातिजातिन्हक बीचम उहाँक  
 बारेम प्रचार हुइल्,  
 संसारक मनै उहाँकम विश्वास  
 कर्ल,  
 ओ स्वर्गम उठागैल।

### तिमोथीह निर्देशन

✕ पवित्र आत्मा स्पष्ट रुपले  
 कैरखल, कि अइना दिनम कत्रा

+३:८ डिकन:

†३.११ "हुँकन्हक गोसिनेन्" -- याकर और अर्थ यी फे हुइसेकठा: मण्डलीम सेवा कर्ना महिलाहुँक

†३.१२ "आपन गोसिन्याप्रति विश्वासयोग्य हुइपठा" -- याकर और अर्थ यी फे हुइसेकठा: यदि ऊ भ्वाज कैरखल कलसे, हुँकाहार  
 एककठा गोसिन्या हुइपठा।

‡३.१५ "परमेश्वरक मण्डली, सत्य सन्देशक खुँटा ओ जग हो" -- यी कलक का हो कलसे, सत्य सन्देश एकठो घरअसक हो, ओ  
 मण्डलीजून उ घरक खुँटा ओ जगअसक हो। खुँटा ओ जग घरह थाम्ह ओ बलगर बनाइअस मण्डली सत्य सन्देशह थम्हना ओ  
 बलगर बनैना काम कठ।



मनै विश्वासमसे पाछ हट्जउइयाबाटा।  
 हुँक छली आत्मक पाछ लगुइयाबाट ओ  
 भूतन्हक सिखाइल बात मनुइयाबाटा।  
 २ ओसिन शिक्षा सिखैना मनै कपटीहुँक  
 ओ झुट बोलुइयन हुइटा। हुँकन्हक  
 विवेक सेन्द्रार लुहाकिले डागलअस  
 मुवल रठन। ३ हुँक भ्वाज कर्ना ओ  
 कत्रा चिज खैना गल्ली हो कैक कठा।  
 तर खैना चिज त परमेश्वर सृष्टि  
 कर्लह। सत्य बात जन्ना विश्वासी  
 मनै धन्यवाद देक उ खाना खाइ सेकठा।  
 ४ परमेश्वरक सृष्टि करल हरेक चिज  
 असल बा। हम्र परमेश्वरह धन्यवाद  
 देक सब चिज खाइ सेकठी। ५ काकरकि  
 परमेश्वरक वचन ओ प्रार्थना उ  
 भोजनह ग्रहणयोग्य बनैठा।

६ यदि टुँ यी बात विश्वासी  
 भैयन् सिखैबो कलसे, टुँ ख्रीष्ट येशूक  
 लाग एक असल सेवक हुइयाबाटो।  
 असिक टुँ अप्न विश्वासम हुर्कलक  
 ओ सत्य शिक्षा पालन कर्लक बात  
 देखुइयाबाटो। ७ टुँ ठरनाठेगानक,  
 अर्थनाबर्थक, परमेश्वरक बदनाम कर्ना  
 बट्कोहीसे दूर रहपठा। परमेश्वरक  
 चाहना अनुसार व्यवहार करपर्ना बात  
 सिख्ठीरहो। ८ शारीरिक कसरत असल  
 हो, तर आत्मिक कसरत झन असल  
 हो, काकरकि यी आबक ओ पाछक  
 जीवनम फाइदा पुगैठा।

९ यी सत्य वचन हो, ओ सब  
 जन यहीह स्वीकार करपठा। १० यहि

कारण हम्र कडा परिश्रम ओ संघर्ष  
 कर्टीरठी। काकरकी हमार आशा जीवित  
 परमेश्वरकम बा। उहाँ सारा मनैन्हक,  
 खास कैक विश्वास करुइयन्हक, मुक्ति  
 देहुइया हुइटा।

११ यहि निर्देशन विश्वासीहुँकन  
 सिखाओ ओ पालन कर कहो। १२ कम  
 उमेरक बाटो कटीम टुहिन तुच्छ  
 सम्झना मौका किहुह फे जिन देओ।  
 तर विश्वासीन्हक आघ बोलीवचनम,  
 चालचलनम, प्रेमम, विश्वासम ओ  
 पवित्र जीवनम एक उदाहरण होओ।  
 १३ मै नैआइत्सम परमेश्वरक वचन  
 पर्हक सुनैना, उत्साह देना, ओ सिखैना  
 कामम लगलरहो। १४ एल्डरहुँक  
 टुहारम हाँठ ढर्ल त अगमवाणीद्वारा  
 टुँहार पाइल आत्मिक वरदानक पूरा  
 सदुपयोग करो।

१५ मै टुहन कहल यहि कर्तव्य मजासे  
 पालन करो ओ पूरा मन लगाक उहिँम  
 लगलरहो, ताकि टुहाँर करल प्रगति  
 सब जन देखहीं। १६ आपन जीवनह ओ  
 आपन शिक्षह ध्यान देक हेटीरहो। यदि  
 टुँ यी बातम लगलरबो कलसे, टुँ मुक्ति  
 पैबो, ओ टुहाँर बात सुनुइयन फे मुक्ति  
 पैहीं।

**विधवा, एल्डर ओ**

**कमारन्हक बारेम सल्लाह**

५ उमेर ढल्कल मनैन जिन  
 हप्काओ, तर आपन बाबह

करअस आदर कैक सम्झाओ। ओ आपनसे कम उमेरक मनैनसेजुन आपन भैया मान्क व्यवहार करो।  
 २ ओसहँक उमेर ढलकल महिलन आपन डाई मान्क ओ आपनसे कम उमेरक महिलनसे जुन आपन बहिन्या मान्क शुद्ध मनले व्यवहार करो।

३ आपन कुई फे नैरहल विधवन्हक रेखदेख करो। ४ तर यदि कौनो विधवक लर्कापर्का या नाटनट्कुर बाटिन कलसे, हुँकहे हुँकाहार रेखदेख करपठा। हुँक सबसे पैल्ह आपन घरपरिवारम कर्तव्य पूरा कर सिखपठा। असिक हुँक आपन डाई-बाबक करल उपकारक ऋण चुत्ता करसेकठ। ओसिक कर्लसे परमेश्वर फे खुशी हुइठ। ५ आपन कना कुई फे नैरहल जातिक विधवा त आपन भरोसा परमेश्वरकम ढर्लरठी। ऊ रातदिन परमेश्वरकम बिन्ती-भाउ कर्तीरठी। ६ तर सुख-विलासम मस्त रना विधवा जीटीह मुवल बराबर हो। ७ कुई फे दोष लगाइ नैसेकी कैक विश्वासीहुँकन यहि बातक निर्देशन देओ। ८ तर आपन नातपातन्हक, खासकैक आप्पन घरपरिवारक लालनपालन नैकरुइयन विश्वासमसे पाछ हटल मनै हुइठ। हुँक अविश्वासीहुँकनसे फे खराब रठ।

९ मण्डलीमसे सहायता पैना विधवा-सूचीम ज्याकरत्याकर नाउँ जिन लिखो। ऊ सूचीम नाउँ लिखाइक

लाग विधवा साठी वर्ष नाङ्घल, ओ आपन गोस्याप्रति विश्वासयोग्य हुइल् हुइपठा। १० अत्रकेल नैहोक ऊ असल काम कर्लक कारण सबजहनसे आदर पाइल् हुइपठा, जस्तै--आपन छाईछावन हुर्काइल्, अरदेशीपरदेशीन्हक सेवासत्कार करल्, परमेश्वरक मनैन्हक ग्वारा धोक सेवा करल्, दुखम परल मनैन्हक उपकार करल, ओ अस्तै-अस्तै और असल कामम लगलरहल् हुइपठा।

११ तर कम उमेरक विधवन्हक नाउँ उ सूचीम जिन लिखो, काकरकि पाछ हुँकन्हक भ्वाज कर्ना चाहना बलगर हुइसेकठन, ओ हुँक ख्रीष्टसे दूर हुइसेकठ। १२ तब हुँक पैल्ह करल बाचा भङ्ग कर्लकओसे हुँक दोषी ठह्वाजैठ। १३ उ बाहेक हुँक घरघर नेङ्गना बानी पर्क अल्ल्ही ओ चुकली बटोइना होजैठ। हुँक बटोइही नैपर्ना बात बटोइठ ओ आनक-आनक कामम हाँठ डठ। १४ उहओसे कम उमेरक विधवहुँक फेदोस्र भ्वाज कैक छाईछावा पैहीं, ओ घरगृष्टि चलैहीं कैक मै सल्लाह देह चाहटु। ओसिक कर्लसे हमार विरोधीहुँक हमार बदनाम कर्ना मौकऽ नैपैनेहुइठ। १५ काकरकि कम उमेरक कुई कुई विधवन पैल्हहँ बहकल बाट ओ शैतानक पाछ लागरल।

१६ यदि कौनो विश्वासी बाबुक घरपरिवारम विधवन बाट कलसे, ऊ

हुँकन्हक रेखदेख करपठा। ओसिक कर्लसे मण्डलीह हुँकन्हक बोझ ब्वाक नैपरी ओ मण्डली आपन कना कुई फे नैरहल विधवन्हक रेखदेख करी।

१७ असल तरीकाले काम कर्ना एल्डरहुँकन दोबर आदर करपठा। खासकैक वचन प्रचार कर्ना ओ सिखैना कामम मेहनत करुइयन यी आदर पाइपठा। १८ काकरकि परमेश्वरक वचनम असिक लिखल बा, “दाईबेर गोरुन्हकम मोहकन्या जिन लगैहो” ओ “काम करुइयन ज्याला पाइपठा।”

१९ कस्तिम फे दुइ-तीनजन साक्षी नैहुइट्सम एल्डरह दोष लगाइल बात सुन्बोसुन्बो जिन करो। २० घरीघरी पाप काम कर्तीरहुइयन सारा मण्डलीक आघ हप्काओ। ओसिक कर्बो त औरजन फे डरैहीं।

२१ परमेश्वर, ख्रीष्ट येशू ओ पवित्र स्वर्गदूतन्हक सामुन्नेम मै टुहिन यी निर्देशन बिना भेदभाव पालन करक लाग आज्ञा देहटुँ। पक्षपात कैक कौनो फे काम जिन करो।

२२ किहुह मण्डलीम काम लगाइक लाग हतार-हतारम वाकरम हाँठ डैडर्ना काम जिन करो। आनक पापम सहभागी जिन होओ। अपन्हेह पवित्र ढर्लरहो।

२३ पानी केल जिन पिओ। तर टुहार प्याटीक समस्या रलकओसें ओ टुँ

घरीघरी बेराम पर्ना हुइलकओसें डान-डान अंगूरमद्य फे पिओ।

२४ कत्रा मनैन्हक पाप छर्लङ्ग देखपरजैठन ओ हुँक न्याय हुइनासे आघहें दोषी ठहाजैठ। तर कत्रा मनैन्हक पाप पाछ केल देखपठन। २५ ओसहेंक कत्रा मनैन्हक करल असल काम छर्लङ्ग देखपरजैठन। ओ गुपचुपम कैगिल् असल काम फे एक न एक दिन त अवस्य देखपठा।

६ सब कमाराहुँक आपन-आपन मालिकन पूरा आदर करपठा। ओसिक कर्लसे परमेश्वरक नाउँ ओ हमार सिखाइल बातक बदनाम कुई फे कर नैपाई। २ विश्वासी डाडु-भाइ त हुइट कैक कमाराहुँक आपन विश्वासी मालिकक कम आदर नैकरपरट। बेनसे हुँक झन धेर सेवा करपठा, काकरकि मालिकहुँकन फाइदा हुइना आप्पन प्रिय विश्वासी डाडु-भाइहुँकन जो फाइदा हुइना हो। टुँ मण्डलीम यिह बात सिखाइपठा, ओ पालन करक लाग उत्साह देहपठा।

### धनसम्पत्तिक मोह

३ कुई-कुई गलत शिक्षा सिखाइ सेकठ, तर हमार प्रभु येशू ख्रीष्टक सिखाइल सत्य शिक्षा त यिह हो, ओ यी शिक्षाले परमेश्वरक आदर

करक लाग सहायता कठी। ४ गलत शिक्षा सिखैना मनै वास्तवम कुछु फे नैजन्लरटा। हुँक़ घमण्डी हुइट ओ कामनाकाजक वादविवाद कठै, ओ एक-एक शब्द लेक झगरा कर खोज्ठा। ओसिन बातले डाहा, बेमेल, बदनाम, ओ खराब शंका केल उत्पन्न करैठा। ५ हुँक़ एकदमसे कचकच-कचकच कर्टीरठा। हुँकन्हक बुद्धि जो बिग्रल बाटन। हुँक़ सत्य बातसे दूर होरल ओ परमेश्वरक भक्ति कर्ना काम धनी हुइना उपाय हो कैक विचार कठै।

६ वास्तवम सन्तोष होक परमेश्वरक भक्ति कर्ना बरा धन हो। ७ काकरकि जन्मबेर हम्र का लेक अइली? ओ मुवबेर का लेक जैबी? ८ उहओसें यदि हमन खैना लगैना पुगल त होगैल् नि। ९ तर धनी हुइ खोजुइयन परीक्षम पठै, ओ खराब ओ हानिकारक चाहना हुँकन फँसाडठन। उह चाहना हुँकन घँस्यैटी सर्वनाशम लैजैठन। १० काकरकि धनसम्पत्तिक मोह नै सब किसिमक खराबीक जर हो। कत्रा जन त धनक ल्वाभले विश्वासमसे पाछ फे हटरल, ओ आपनम अपन्हे दुख खन्ह्यारखल।

### तिमोथीह पावलक आदेश

११ तर टुँ त परमेश्वरक जन हुइलकओसें ओसिन बातसे दूर रहपठा। टुँ परमेश्वरह खुशी लगना असल जीवन जीएपठा, ओ विश्वासयोग्य, प्रेमिलो, सहनशील ओ नम्र हुइपठा। १२ अनन्त जीवनक इनाम पाइक लाग सेना लडाईं करअस विश्वासक लडाईं मजासे लडो, काकरकि यिह जीवनक लाग परमेश्वर टुहिन बलैलह। ओ यिह जीवनक सम्बन्धम टुँ धेरजन्हक सामुन्नेम आपन विश्वासक बारेम स्पष्ट रुपले बटोइलक फे हुइतो। १३ सब चिजह जीवन देहुइया परमेश्वर ओ पन्तियस पिलातसक सामुन्नेम सत्य साक्षी देना ख्रीष्ट येशूक आघ १४ मै टुहिन यी आज्ञह हमार प्रभु येशू ख्रीष्ट फेदोस्र नैआइट्सम पूर्ण रुपले पालन करक लाग कहटु। ओसिक कर्बो त कुइ फे टुहिन दोष लगाइ नैसेक्ने हो। १५ प्रभु येशू ख्रीष्टह ठीक समयम परमेश्वर जो फेदोस्र पठुइयाबाटा। परमधन्य परमेश्वर जो सारा शक्तिक मालिक, राजाहुँकन्हक राजा, ओ प्रभुहुँकन्हक प्रभु हुइटा। १६ उहाँ केल नैमुट, ओ उहाँ कुई फे पुग नैसेक्ना भारी चम्कना ज्योतिम रठा। उहाँह ना त कुई देखलहो, ना त कुई द्याख सेक्ठा।

सारा शक्ति ओ आदर सड्डभर उहाँकऽ हो। आमेन।

१७यी संसारम धनी रहल मनैन घमण्डी जिन होओ कैक कहो। अनिश्चित धन सम्पत्तिम नाही तर सब थोक प्रशस्त हिसाबले हमन उपभोग कर देना परमेश्वरकम भरोसा करो कैक हुँकन सिखाओ। १८आनक भलाई करपठा, असल कामम धनी हुइपठा, खाँचोम परल मनैन सहायता देहपठा ओ आपनठे रहल चिज औरजहनसे बाँड्चुँड करपठा कैक हुँकन

निर्देशन देओ। १९असिक हुँक आप्पन लाग सत्य धन जम्मा करही, जौन धन अइना जीवनक लाग एक पक्का जग बनी, ओ हुँक सत्य जीवनक अनुभव करहीं।

२०हेरो तिमोथी, टुहार जिम्मम परमेश्वरक देहल चिजिक मजासे सुरक्षा करो। परमेश्वरक अपमान हुइना मूर्ख बातसे ओ कत्रा मनै 'ज्ञान' कैक मानल झूट बातसे अलग रहो। २१काकरकि असिन बातक पाछ लाग्क कत्रा जन विश्वासमसे पाछ हट्रल।

दुह सबजन्हकम प्रभुक कृपा पलरह।



# तिमोथीह

पावलक लिखल द्वासर चिठी

## चिठीक परिचय

पावल रोमम द्वासर फ्यारा कैदम परल ब्याला यी चिठी तिमोथीह लिखलह। उ समयम तिमोथी एफिससम रहल मण्डलीक एकठो अगुवा रलह।

यी चिठीम पावल तिमोथीह व्यक्तिगत सरसल्लाह देरखल। उ सल्लाह का हो कलसे भक्तिभावसहित येशू ख्रीष्टक विषयम साक्षी देना, उहाँक खुशिक खबर अनुसार चल्ला, दुःख ओ विरोध परिअइलसे फे आपन कर्तव्य पालन कर्टरिना हो।

तिमोथीह खास कैक “संसारक मूर्ख चिजसे” होशियार रहपर्ना चेताउनी देगैल् बा। तिमोथी साहसी ओ अनुशासित होक जीएपर्ना ओ झुटा शिक्षह हटाइपर्ना बात फे यी चिठीम लिखल बा।

### विषयसूचि

- अभिवादन (१:१-२)
- धन्यवाद ओ उत्साह (१:३-२:१३)
- दुइ किसिमक अगुवन (२:१४-२६)
- अन्त्यक दिन (३:१-९)
- तिमोथीह पावलक आदेश (३:१०-४:८)
- व्यक्तिगत बात (४:९-१८)
- आखिरी अभिवादन (४:१९-२२)





### अभिवादन

१ परमेश्वरक इच्छाद्वारा ख्रीष्ट येशूक प्रेरित हुइक लाग रोजगैल् मै पावल यी चिठी लिखटु। परमेश्वरक करल प्रतिज्ञक बारेम औरजहन सुनाइक लाग मै रोजगैनु। ओ उ प्रतिज्ञा यी हो कि ख्रीष्ट येशूकम विश्वास करुइयन अनन्त जीवन पैठ।

२ म्वार प्रिय छावा तिमोथीह यी चिठी लिखटु। परमेश्वर बाबा ओ हमार प्रभु ख्रीष्ट येशू टुहिन अनुग्रह, दया ओ शान्ति देहीं।

### धन्यवाद ओ उत्साह

३ मै प्रार्थना करवेर रात दिन टुहिन सम्झटीरठु, ओ परमेश्वरह धन्यावाद चहैठु। जसहँक म्वार पुर्खाहुँक परमेश्वरक सेवा कैरखल ओसहँक मै फे शुद्ध विवेकले उहाँक सेवा कर्तु, ओ टुहार लाग उहाँह धन्यवाद चहैठु। ४ टुहारँ आँस गिराइल बात सम्झठु त टुहिन भ्याँट कर्ना भारी इच्छा जगठा। टुहिनसे भ्याँटकर पैलसे कत्रा खुशी लगनेरह। ५ मै टुँहार सच्चा विश्वासक सम्झना कर्तु। यी विश्वास पैल्ह टुँहार नानी लोइस ओ टुँहार डाई युनिसकम रलहन, ओ यी विश्वास आब टुँहारम फे बा कना बातम म्वार कुछु शंका नैहो। ६ उहओसे मै टुँहिन सम्झना

दिलाइटु, कि मै टुँहारम हाँठ ढर्नु त परमेश्वर टुहिन देहल वरदानक पूरा सदुपयोग करो। ७ काकरकि परमेश्वर हमन डरक आत्मा नाहि, तर शक्ति, प्रेम ओ अपन्हेह अधीनम ढर सेक्ना आत्मा देरखल।

८ उहओसे हमार प्रभुक साक्षी देना कामम शरम जिनमानो, ओ मै कैद पर्लकम फे शरम जिनमानो, बेनसे परमेश्वरक शक्तिम खुशीक खबर सुनैना काममा टुँ म्वारसँग दुःख भ्वागक लाग तयार होओ। ९ परमेश्वर हमन बचाक आपन मनै हुइक लाग बलैल। हमार करल कामक आधारम नाही, तर उहाँक आपन इच्छा ओ अनुग्रहक आधारम हो। यी अनुग्रह परमेश्वर जुगौंजुगसे ख्रीष्ट येशूक माध्यमसे हमन देरखलह। १० तर हमार मुक्तिदेहुइया ख्रीष्ट येशू अइल त यी बात प्रकट हुइलक हो। उहाँ मृत्युह जीत्क नाश नैहुइना जीवनह खुशिक खबरक माध्यमसे प्रकाशम अन्ल। ११ यिह खुशिक खबर सुनाइक लाग परमेश्वर महीह प्रचारक, प्रेरित ओ शिक्षक हुइक लाग नियुक्त कर्लह। १२ उहओसे मै यी दुख भोगटीबाटु। तर मै यी बातम नैशमैटु, काकरकि मै क्याकरम विश्वास कैरखनु उ बात महीह थाहाँ बा। जौन बात मै उहाँह

सुम्परख्नु+, उ बात उहाँ आपन अइना दिनसम सुरक्षित ढर सेक्नेबाट कना मै ढुक्क बाटु।

१३ महिसे टुँ ज्या शिक्षा सिख्लो, उ सत्य शिक्षक सही नमुना मानो। प्रभु येशूकम रहल विश्वास ओ प्रेमम स्थिर रहक सब मनैन सिखाओ। १४ टुहारम जिम्मा लगागैल् असल बातह हमारम वास कर्ना पवित्र आत्मक सहायताले सुरक्षित ढर्लरहो।

१५ टुहन थाहँ बा एशियम बैस्ना सक्कु जन महीह छोर्क गैल, हुँक्रमध्ये फुगेलस ओ हर्मोगेनस फे हुइट।

१६ ओनेसिफरसक घरपरिवारन प्रभु दया करहीं। काकरकि ऊ महीह धेर फ्यारा हौसला देलह, ओ मै झेलखानम रहबेर म्वार हाँठम बाँधल सिक्रीक फे हुँकहिन शर्म नैलग्लन्। १७ तर ऊ रोमम अइल त महीह नैभेटाइटसम दिलोज्यानले म्वार खोजि कर्ली। १८ प्रभुक अइना दिनम हुँकहिन प्रभु कृपा करहिन। मै एफिससम रहबेर ऊ म्वार पूरा सेवा कर्लह कना बात टुहन थाहँ बा।

२ उहओसेँ हेरो तिमोथी, म्वार छावा, ख्रीष्ट येशूक दिहल अनुग्रहम बलवान होओ। २ मै धेर मनैन्हक सामुन्नेम सिखाइबेर टुँ ज्या सुन्लो, उ बात औरजहन फे सिखाइ सेक्ना विश्वासयोग्य मनैन जिम्मा

देओ। ३ ख्रीष्ट येशूक असल सिपाहीअस दुख उठाउने कामम हमारसँग सहभागी होओ। ४ सेनाम भर्ना हुइल् सिपाही और कामम अल्लल नैरट, काकरकि आपन सेनापतिह खुशी पर्ना हुँकन्हक लक्ष्य रठन। ५ खेलम भाग लेना खेलाडी नियम अनुसार नैख्यालट कलसे इनाम फे नैपाइस्यकट। ६ पसना बहाक खेती करइया किसानक जो बालिक पहिला भाग पैना अधिकार रठस्। ७ म्वार कहल बातह मजासे विचार करो, काकरकि यी सब बात बुझक लाग प्रभु टुहिन सहायता करहीं।

८ मुवलमसे जीयल दाऊदक सन्तान येशू ख्रीष्टह याद करो, म्वार प्रचार करल खुशीक खबर यह हो। ९ यह खुशिक खबर सुनैलक कारण मै जेलम अपराधीअस साइलाले बाहान्नेल् बाटु। तर परमेश्वरक वचन त कुछु चिजले बाँध नैसेक्जाइट। १० उहओसेँ मै परमेश्वरक चुनल मनैन्हक हितक लाग सब चिज सहटु, कि हुँक फे ख्रीष्ट येशूकम रहल मुक्ति प्राप्त कर सेकहीं ओ अनन्तसम्मक महिमाम सहभागी हुइसेकहीं।

११ यी बात सत्य हो,

यदि हम्र उहाँकसँग मुली कलसे,  
हम्र उहाँकसँग जिने फे बाटी।

+१.१२ "मै उहाँह सुम्परख्नु" -- याकर और अर्थ यी फे हुइसेकटा: उहाँ महीह सुम्परख्नु।

१२ हम्र धीरज कैक दुःखकष्ट सहबी कलसे,  
 उहाँकसँग राज्य फे कर्नेबाटी।  
 हम्र उहाँह अस्वीकार कर्बी कलसे,  
 उहाँ फे हमन अस्वीकार कर्नेबाटा।  
 १३ हम्र विश्वासयोग्य नैरलसे फे,  
 उहाँ विश्वासयोग्य पलरनेबाट,  
 काकरकि उहाँ आपन स्वभावक  
 विरोधम जाइ नैसेक्नेहुइटा।

**परमेश्वरद्वारा ग्रहणयोग्य कामदार**

१४ विश्वासीहुँकन यी बात सम्झादेओ, ओ शब्दक विषयम बिना अर्थक वादबिवाद जिन करहीं कैक परमेश्वरक आघ चेताउनी देओ जौन बातले केकरो भलाइ नैकरट् बेनसे सुन्ना मनैन हानि केल पुगैठा। १५ लजाइ नैपर्ना ओ सत्य शिक्षाह ठीकसे उपयोग कर्ना कामदारअस आपन जीवनह परमेश्वरक आघ ग्रहणयोग्य बनैना पूरा कोसिस करो। १६ परमेश्वरक अपमान कर्ना बिनाकामक बकवाससे दूर रहो, काकरकि असिन बकवासले त झन-झन परमेश्वरसे दूर लैजिठा। १७ असिन बकवास करुइन्हक शिक्षा सइन खाटीअस भित्र-भित्र कुहटी जैठन। हुमेनियस ओ फिलेतसक शिक्षा फे अस्तहँ बाटन। १८ हुँक सत्य बातसे दूर गैरला हुँक मुवलमसे जीना

काम होस्याकल आब नैहुइकरट् कैक कत्राजन्हक त विश्वासऽ खलबलादेरखल। १९ तर फे परमेश्वरक आपन बैसाइल जग सहभर अटल बाटन, ओ उहिम यिह लिखल छाप लागल बा, “प्रभु आपन मनैन चिन्ठ,” ओ “अपन्हेह प्रभुक मनै कहुइयन सब जन खराब कामसे दूर रहीं।”

२० कौनो बरा घरम स्वान ओ चाँदीक भाँरा केल नैरटन्, तर माटी ओ कट्ठोक भाँरा फे रठन्। कुछु भाँरा विशेष कामक लाग चलाजैठा त कुछु भाँरा साधारण कामक लाग चलाजैठा। २१ यदि कौनो मनैया अपन्हेह नैमजा कामसे शुद्ध ठाँ कलसे, ऊ असल कामक लाग एकठो व्यक्ति बन्ने बा, ओ ऊ च्वाखापारल ओ मालिकक् प्रयोगक लाग उपयोगी ओ हरेक असल काम करक लाग तत्पर हुइने बा।

२२ उहओसे जवानीक लालसासे दूर भागो, ओ शुद्ध हृदयले प्रभुह पुकारा करुइयन्हकसँग धार्मिकता, विश्वास, प्रेम ओ शान्तिक पाछ लागो। २३ तर बिनाअर्थक उटपट्याइ वादबिवादसे दूर रहो, दुहिन थाहाँ बा कि असिन विवादले झग्रा केल पठा। २४ प्रभुक सेवा कर्ना मनै झग्राहा नैहुइपरट्, बेनसे सबजहन दया कर्ना, सबजहनसे मिलना, औरजहन सिखाइ सेक्ना

ओ सह सेकना हुइपठा। २५ आपन विरोधीहुँकन नम्र होक सम्झाइपठा, शायद परमेश्वर हुँकन आपन मन बदलना मौका देठ, ओ सत्यह चिन्ह सेकना बुद्धि देठ कि। २६ असिक हुँक होशम आक शैतानक फान्दमसे उम्कनेबाटा। काकरकी शैतान आपन इच्छा पूरा करक लाग हुँकन आपन कब्जम ढरल बा।

### अन्त्यक दिन

३ तर अन्त्यक दिनम दुःखकष्टक समय अइनेबा कना बात बुझलरहो। २ उ ब्याला मनै स्वार्थी, रुप्यापैसक लोभी, घमण्डी, डिट्गर, औरजन्हक बदनाम कर्ना, डाई-बाबन्हक मतलब नैकर्ना, बैगुनी ओ अपवित्र हुइनेबाटा। ३ केक्रोप्रति प्रेम नैरहल, निर्दयी, चिब्लीचिब्लक बात बट्वइना, छाडा, क्रूर ओ असल बातह मन नैपरैना हुइनेबाटा। ४ हुँक विश्वासघाती, मनपरी कर्ना, घमण्डले फुलल, परमेश्वरक सटाहा सुखविलासह मन परैना हुइनेबाटा। ५ हुँक भक्तिक भेष ढरठ तर वाकर शक्तिह इन्कार कठ। असिन मनैनसे दूरऽ रहो।

६ हुँकमध्ये कत्रा मनै घर-घरम जाक पापक बोझले दबल, किसिम-किसिमक

खराब इच्छक वशमा परल, कमजोर महिलन आपन अधिनम पठ। ७ ओसिन महिलन सिखना त सिक्ठ, तर सत्य ज्ञानसम कब्बुनी पुग सेकट। ८ यान्नेस ओ याम्ब्रेस मोशक विरोध करअस, यी मनै फे सत्यक विरोध कठ। हिँकन्हक भ्रष्ट दिमाग ओ नक्कली विश्वास बाटन। ९ तर हिँक धेर टिक सेकुइया नैहुइट, काकरकि यान्नेस ओ याम्ब्रेसकअस हिँकन्हक मूर्खता सबजन्हक सामनेम प्रकट हुइहिन्।

### सत्य शिक्षम स्थिर रना

१० तर हुँ म्वार शिक्षा, म्वार चाल-चलन, म्वार जीवनक लक्ष्य, म्वार विश्वास, म्वार धैर्य, प्रेम ओ स्थिरता देखरख्लो। ११ एन्टिओखिया, आइकोनियन ओ लुस्त्रा शहरम म्वार भ्वागल दुःखकष्ट हुँ मजासे बुझलबाटो। मै कसिन-कसिन सतावट सहनु, तर फे प्रभु महीह उ सब आपत-विपतमसे बचैल। १२ ख्रीष्ट येशूक मनै होक असल जीवन जिए खोज्ना मनैन्हकम सतावट त अवश्य फे अइने बा। १३ तर दुष्ट ओ ठग्गाहुँक औरजहन ठग्टी ओ ठग्वापैटी झन्-झन् दुष्ट हुइटी जैनेबाट।

१४ तर टुँ आपन सिखल ओ पूरा मनले विश्वास करल शिक्षम स्थिर पलरहो, काकरकि यी बात टुँ केहि-केहिसे सिखलहो उ बात टुहीन थाहँ बा। १५ छोटिहसे टुँ परमेश्वरक वचनक बात जानरख्लो। यहि बातले ख्रीष्ट येशूकम विश्वास करलसे मुक्ति पाजैना बारेम बुझना ज्ञान देठा। १६ परमेश्वरक सारा वचन परमेश्वरक प्रेरणाद्वारा रचगैल् हो। यी हमन सत्य बात सिखाइक लाग ओ हमार गलती हमन महसुस कराइक लाग उपयोगी बा। यी हम्र गलती करल ब्याला हमार सुधार कर्ठा ओ असल जीवन बिताइक लाग हमन सिखैठा। १७ परमेश्वर यहि वचन प्रयोग कैक आपन मनैन हरेक असल कामक लाग पूर्ण रूपले तयार पठै।

४ परमेश्वरक सामनेम ओ ख्रीष्ट येशूक सामनेम, जे आपन राज्य स्थापना कर अउइयाबाट ओ जिटीह ओ मुवल मनैन्हक न्याय करुइयाबाट कना बात ध्यानम टैक मै टुहिन कर्वा आज्ञा देहटुँ, कि २ परमेश्वरक वचन सुनाओ। ब्यालम फे, कुब्यालम हुइलसे फे परमेश्वरक वचन सुनाइ जिन छोरो। धिरजी होक मनैन सम्झाबुझा पारो, चेतावनी देओ ओ हुँकन्हक हिम्मत बहादेओ। ३ काकरकि असिन समय

आइटा, उ समयम मनै ठीक शिक्षा फे नैसहनेहुइट, बेनसे हुँकन मन परल बात केल सुनैना हुँकन्हक इच्छालागल धेर शिक्षकहुँकन कुहेइहीं। ४ हुँक सत्य बातह इन्कार करहीं, तर बट्कोहीक पाछ लगहीं। ५ तर टुँ सब परिस्थितिम सचेत रहो, कष्ट उठाओ, खुशिक खबर सुनैना कामम लगल रहो ओ आपन सेवकाइक कामकर्तव्य सब पूरा करो।

६ काकरकि, मै त बलिक रूपम अर्पण हुइकलाग बाटु ओ म्वार बिदा हुइना ब्याला आस्याकल। ७ मै मजासे लडाइ कैरखनु, आपन दौड पूरा कैरखनु ओ विश्वासह जोगैलबाटु। ८ आब परमेश्वर म्वार जीवन देख्क खुसी हुइलकओसे म्वार लाग पुरस्कार टैरखल।<sup>+</sup> उ पुरस्कार ठीकसे न्याय कर्ना प्रभु उ दिन महीह देहुइयाबाट, महीह केल नाही, तर प्रेमपूर्वक उहाँक अइना दिनिक बट्या हेर्ना सबजहन देहुइयाबाट।

### व्यक्तिगत बात

९ म्वारठे झट्ट अइना कोसिस करो। १० डेमास यी संसारक मोहम फँस्क महीह छोर्क थेसलोनिका शहरम गैरहल्। क्रेसेन्स गलातिया क्षेत्रम ओ तीतसजुन दलमातिया क्षेत्रम गैरल।

<sup>+</sup>४.८ "आब परमेश्वर म्वार जीवन देख्क खुसी हुइलकओसे म्वार लाग पुरस्कार टैरखल।" -- याकर शाब्दिक अनुवाद: आब म्वार लाग धार्मिकतक पुरस्कार टैगिल बा।

११ लूका केल म्वारसँग बाटा। मर्कूसह आपनसँग लेक अइहो, काकरकि ऊ म्वार कामम धेर सहायता कर सेक्नेबाटा। १२ मै तुखिकसह एफिसस शहरम पठारख्नु।

१३ त्रोआसम कार्पसकठे म्वार छ्वारल कम्प्रा टुँ आइबेर आन्देहो। उहाँ रहल किताब आन्देहो, विशेष कैक छालावाला किताबभर बिनाबिचैल आन्देहो।

१४ तमटा अलेक्जेन्डर म्वार भारी हानि कैराखला। प्रभु ओहिह वाकर काम अनुसार बदला लेहुइयाबाटा। १५ ऊ हमार करल प्रचारक भारी विरोध कैराखला। टुँ फे ओहिसे होशियार रहो।

१६ पैल्हक फ्यारा म्वार मुद्दा चलबेर म्वार पक्षम कौनो जन फे नैबोल्ल, सबजन महीह छोरदेला। यी बातक दोष हुँकन जिन लाग। १७ तर प्रभु म्वार साथम रहक शक्ति

देलकओसे मै सब जातिक मनैन खुशिक खबर पूर्ण रूपले सुनैना मौका पैनु। ओ परमेश्वर महीह सिंहक मुहमसे बचैल। १८ प्रभु महीह सारा खराबीमसे बचैहीं, ओ उहाँक स्वर्गक राज्यम सुरक्षासाथ लैजहीं। उहाँक गुणगान सड्डभर हवाए। आमेना।

### आखिरी नमस्कार

१९ प्रिस्किला, अकिलास ओ ओनेसिफरसक घरपरिवारन फे म्वार नमस्कार कैदेहो। २० इरास्तस कोरिन्थ शहरम रहगैल, त्रोफिमसह मै मिलेटस शहरम बेराम अवस्थम छोरक आरनु। २१ हिउँद शुरु हुइनासे आघ अइना कोशिश करहो। युबुलस, पुडेस, लिनस, क्लौडिया ओ और सक्कु भैयहुँक टुहिन नमस्कार कैरखल।

२२ प्रभु दुहाँर साथम पलरहीं ओ दुह सबजन्हकम प्रभुक कृपा पलरह।

४:११ - कल ४:१४; फिले २४; प्रे १२:१२, २५; १३:१३; १५:३७-३९; कल ४:१०.

४:१२ - प्रे २०:४; एफि ६:२१-२२; कल ४:७-८.

४:१३ - प्रे २०:६.

४:१४ - १ तिमो १:२०; भज ६२:१२; रोम

२:६. ४:१९ - प्रे १८:२; २ तिमो १:१६-१७.

४:२० - प्रे १९:२२; रोम १६:२३; प्रे २०:४; २१:२९.

# तीतसह

## पावलक लिखल चिठी

### चिठीक परिचय

तीतस परमेश्वरकम विश्वास नैकर्ना घरक मनैया रलह। उ पाछ परमेश्वरकम विश्वास कर्ल ओ पावलकसंग खुशिक खबर प्रचार कर्ना कामम सहभागी हुइल। पावल ओ तीतस दुनु जन क्रेट कना टापुम रलह। हुँक उहाँ खुशिक खबर प्रचार कैक मण्डली स्थापना कर्ल। पावल क्रेटसे निकोपोलिस कना शहरम जाइलगल त, उ क्रेटम रहल विश्वासीन रेखदेख ओ व्यवस्थित करक लाग तीतसह उहँ बैठ लगैल।

कुछ समय पाछ पावल तीतसह यी चिठी लिखल। चिठीम पावल मण्डली मजासे सञ्चालन करक लाग तीतसह निर्देशन देरखल। पावल मण्डलीम अगुवन्हक चालचलनक बारेम ओ विभिन्न उमेरक विश्वासीन सिखैना बारेम निर्देशन देरखल। पावल तीतसक व्यक्तिगत जीवन औरजन्हक लाग उदाहरण हुइपर्ना बारेम फे सल्लाह देरखल। पावल झुट प्रचार करुइयन्हक चरित्र खराब रलक ओ हुँकनसे सतर्क रहपर्ना बारेम तीतसह चेतावनी फे देरखल।

### विषयसूचि

अभिवादन (१:१-४)

पावल मण्डलीम एलडरहुँकन नियुक्त कर्ना बारेम सल्लाह देठ (१:५-९)

पावल झुट प्रचार करुइयन्हक नैमजा चरित्रक बारेम तीतसह चेतावनी देठ

(१:१०-१६)

पावल ख्रीष्टीयनहुँक करपर्ना व्यवहारक बारेम बटोइठ (२:१-१०)

परमेश्वर मनैन पापक दण्डसे बँचैठ (२:११-१५)

अख्रीष्टीयनहुँकन्हक बीचम ख्रीष्टीयनहुँकन्हक जीवन (३:१-११)

आखिरी सल्लाह ओ नमस्कार (३:१२-१५)





### अभिवादन

१ परमेश्वरक सेवक ओ येशू ख्रीष्टक प्रेरित+ मै पावल यी चिठी लिखटुँ। परमेश्वरक च्वाजल मनैन विश्वासम बलगर कराइक लाग ओ हुँकन सत्य बातक ज्ञान देहक लाग मै पठागैनु। उ ज्ञान हुँकन परमेश्वरक इच्छा अनुसार जीवन जीएक लाग सहायता पुगैठन। २ ओ उ विश्वास ओ ज्ञान अनन्त जीवन पैना आशम आधारित बा, जौन जीवन झुट नैबोल्ना परमेश्वर सृष्टिसे आघहँ हमन देना प्रतिज्ञा कर्ल। ३ उहाँ ठीक समयम आपन वचन खुशिक खबरक प्रचारसे प्रकट कर्ल। उ खबर प्रचार कर्ना जिम्मा, हमन मुक्ति देहुइया परमेश्वरक आज्ञा अनुसार, महीह लगागैल।

४ तीतस, मै टुहिन यी चिठी लिखटुँ। टुँ म्वार सगग छावाअस बाटो, काकरकि हमार विश्वास एक्क बा। परमेश्वर बाबा ओ हमन मुक्ति देहुइया ख्रीष्ट येशू टुहिन अनुग्रह+ ओ शान्ति देहीं कना म्वार आशा बा।

पावल मण्डलीम एल्डरहुँकन नियुक्त कर्ना बारेम तीतसह सल्लाह देठ

५ टुँ, म्वार देहल निर्देशन अनुसार, बाँकी रहल काम पूरा करक लाग ओ हरेक शहरम परिपक्व मनैन एल्डर पदम नियुक्त करक लाग मै टुहिन क्रेटम छोर्नहुँ। ६ एल्डर+ कुछु दोष नैलागल जीवन जीएपठा। ऊ एक्कठो गोसिन्या लेहपठा, हुँकाहार लर्कापर्का विश्वासी हुइपठा, ओ खराब चरित्र रहल ओ कहल नैमन्ना बातक दोष लगैना ठाउँ रहल नैहुइपरट। ७ मण्डलीक अगुवा परमेश्वरक कामक रेखदेख करइया हुइलकओसे, उ कुछु दोष नैलागल जीवन जीएपठा। उ जिद्दीवाल, झनक्क रिसाजैना, मत्वच्या, झगरगाँठ्या, या धनक लोभी हुइ नैपरट। ८ बेनसे उ आपन घरम आइल मनैन स्वागतसत्कार कर्ना, असल काम मन परैना, विचारशील, इमान्दार, पवित्र, ओ अपन्हेह अधीनम ढर्ना हुइपठा। ९ ऊ सत्य शिक्षाले औरजहन हौसला देह सेकहीं, ओ यी बातक विरोध करइयन्हक गल्ती फे देखादेह सेकहीं कैक हुँकहीन सिखागैल भर पर्ना वचनम उ अडिग रहपठा।

+१.१ प्रेरित: प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक च्वाजल बाह्व जन चेलावँ हुँडट (मर्कुस ३:१४; ६:३०)। थप जानकारीक लाग "प्रेरित" शब्दक अर्थ हेरी।

†१.४ अनुग्रह: अनुग्रह कलसे क्षमादान, मुक्तिदान, अचूक प्रेम, अपार कृपा आदि विषयह समेट्ठा। थप जानकारीक लाग "अनुग्रह" शब्दक अर्थ हेरी।

‡१.६ एल्डर: मण्डलीम प्रचार कर्ना, सिखैना, सञ्चालन कर्ना, रेखदेख कर्ना मनै एल्डरहुँकन रहल (प्रेरित ११:३०; १५:६; २०:१७)। थप जानकारीक लाग "एल्डर" शब्दक अर्थ हेरी।

पावल झुठ शिक्षकहुँकन्हक नैमजा  
चरित्रक बारेम तीतसह चेतावनी देठ

१० काकरकि धेर मनै अगुवन्हक  
अधीनम नैरना, फोगटिया गफ लगैना,  
ओ छली रठा खास कैक खतना+  
करपठा कैक कहुइयन ओसिन बाटा।  
११ हुँकन्हक मुहम बुजा नैलगाक नैहुई,  
काकरकि हुँक पैसा कमाइक लाग  
झुठ शिक्षा सिखाक सारा घरपरीवारक  
मनैन भॉरडार्ट। १२ एकचो हुँकन्हके  
एकठो अगमवक्ता+ हुँकन्हक बारेम  
असिक कलह, "क्रेट टापुक मनै सड्ड झुठ  
बोलुइयन, जंगली जनावरक स्वभाव  
रहल दुष्ट मनै, ओ कोह्ली डलिड्डर  
हुइटा।" १३ यी बात सत्य हो। उहओसें  
हुँक पक्का विश्वासी हुइ सेकहीं कैक  
हुँकन करसे हप्काओ, १४ ओ यहूदीन्हक  
बट्कोहीम ओ सत्य बातह इन्कार  
करुइयन्हक आजम ध्यान नैदेहीं।

१५ शुद्ध मन रहल मनैन्हक लाग सब  
चिज शुद्धह रठा। तर भ्रष्ट मन रहल  
ओ विश्वास नैकर्ना मनैन्हक लाग कुछ  
चिज फे शुद्ध नैरहट, काकरकि हुँकन्हक  
मन ओ विवेक जो भ्रष्ट रठन। १६ हुँक  
परमेश्वरह चिन्हलक दावी त कर्ठ, तर  
हुँकन्हक व्यवहारले हुँक परमेश्वरह  
इन्कार कर्लक बात देखैठन। हुँक

घिनलगिटक ओ अनाजाकारी बाट, ओ  
कुछ असल काम कर जन्ना नैहुइटा।

### पावल ख्रीष्टीयनहुँक करपना व्यवहारक बारेम सिखैठ

२ तर टुँ सत्य शिक्षासे मिल्ला  
बात केल सिखाओ। २ उमेर  
ढल्कल मनैन अकिल रहल, आदर  
पैना हिसाबक, अपन्हेह अधीनम ढर्ना  
हुइपठा कैक सिखाओ। ठीक शिक्षा  
विश्वास करपठा, पवित्र प्रेम करपठा,  
ओ सहनशील हुइपठा कैक हुँकन कहो।

३ ओसहँक, उमेर ढल्कल महिलन  
परमेश्वरह आदर देना हिसाबक जीवन  
जीएपठा। हुँक बिना पट्टक औरजहन  
दोष लगाइ नैपरट, जाँरडारुम बान  
बैठाइ नैपरट, तर औरजहन मजा बात  
सिखाइपठा कैक अर्ती देओ। ४ तब  
हुँक उमेर नैढल्कल महिलन आपन-  
आपन गोस्सेन ओ छाईछावन प्रेम  
कर्ना ५ अपन्हेह वशम ढर्ना, शुद्ध मनक  
हुइना, घरजम कर्ना, दयालु हुइना,  
ओ आपन-आपन गोस्सेक अधीनम रना  
बातक सल्लाह देह सेकहीं। ओसिक  
कर्लसे, परमेश्वरक वचनक बदनाम  
नैहुइनेहो।

६ ओसहँक, जवान मनैन अपन्हेह  
वशम ढरक लाग अर्ती देओ। ७ सब

+१.१० खतना: लिंगक टुप्पक छाला काट्क फँकना यहूदी विधिह खतना कैजिठा। थप जानकारीक लाग "खतना" शब्दक अर्थ हेरी।

+१.१२ अगमवक्ता: अगमवक्ता कलक परमेश्वरक बलाइल व्यक्ति अर्थात् परमेश्वरक तर्फसे बोला व्यक्ति या परमेश्वरक प्रवक्ता हुइटा। थप जानकारीक लाग "अगमवक्ता" शब्दक अर्थ हेरी।

बातम असल कामक उदाहरण होक हुँकन देखाओ, ओ हुँकन सिखाइबेर स्वाइन ओ गम्भीर होओ। ८ कुइ फे काट नैसेकना सत्य वचन बोलो, तब हमार बारेम कुछु खराब बात नैपैहीं कलसे हमार विरोधीहुँकन शर्मम परहीं।

९ कमारहुँकन फे आपन-आपन मालिकक अधीनम रहक सब कामम हुँकन जो खुसी बनैहीं। हुँकन मालिकसे मुहमुह नैलगहीं, १० ओ हुँकन्हक कुछु चिज फे सट्याकसुटुक नैपरहीं। बेनसे हुँकन अपन पूरा रुपले असल ओ भर पर्ना रहल बात देखैहीं। तब हुँकन हरेक बातम हमन मुक्ति देहुइया परमेश्वरक बारेम सिखाइल बातक शोभा बहाइ सेकहीं।

११ काकरकि सारा मनैन मुक्ति देहक लाग परमेश्वरक अनुग्रह प्रकट होरहल। १२ यी अनुग्रहक कारण हम्र असिन बात सिखी, कि परमेश्वरक आदर नैहुइना काम ओ संसारक चिजिक लालच छवारपर्ना। हम्र अपन्हेह अधीनम ढर्ना ओ धर्मी हुइपर्ना, ओ परमेश्वरक आदर हुइना हिसाबले यी संसारम जीवन जीएपर्ना। १३ याकर सँगसँग, हम्र आशा कैक हमन खुसी बनैना दिनिक बट्या हेठी, जौन दिन हमार महान परमेश्वर ओ हमन मुक्ति देहुइया येशू ख्रीष्ट आपन गौरवम प्रकट हुइयाबाट। १४ ख्रीष्ट हमन सारा पापमसे मुक्ति देहक लाग ओ सारा खराबीमसे पवित्र बनाइक

लाग आपन प्राण देलह। उहाँ चहल, कि हम्र असल कामम उत्सुक ओ उहाँक आप्न मनै हुइ सेकी।

१५ यह बात विश्वासीन सिखाओ, ओ हौसला देना ओ हकैना काम पूरा अधिकारसहित करो। टुँहार बातक मतलब नैकर्ना मौका किहुह फे जिन देओ।

### अख्रीष्टीयनहुँकन्हक बीचम ख्रीष्टीयनहुँकन जीना तरीका

३ सरकार ओ सरकारी मनैन्हक अधीनम रहपर्ठा, कहल मानपर्ठा, ओ हरेक असल काम करक लाग तयार रहपर्ठा कैक विश्वासीहुँकन सम्झाओ। २ केक्रो बदनाम नैकरपरट, किहुसे झगरा नैकरपरट, तर सबजहनसे मिलनसार ओ लरम व्यवहार करपर्ठा कैक हुँकन कहो।

३ काकरकि हम्र अपन्हे फे एक समयम मूर्ख ओ कहल नैमन्ना रलही। हम्र भूलम परल रलही, ओ कामवासनम ओ सुखविलासम फँसल रलही। हमार जीवन दुष्टता ओ बिह मुनाले भरल रह। मनै हमन हेल्हा करँट, ओ हम्र फे हुँकन हेल्हा करी।

४ तर जब हमन मुक्ति देहुइया परमेश्वरक दया ओ प्रेम प्रकट हुइल, ५ तब उहाँ हमन मुक्ति देल। यी मुक्ति हम्र धार्मिक काम कर्लक कारण नाहीं,

तर हमन दया कर्लक कारण देलह।  
 उहाँ पवित्र आत्मासे हमार पाप धोक  
 हमन लौव जरम+ ओ लौव जीवन  
 देल। ६ उहाँ यी आत्मा हमन मुक्ति  
 देहुइया येशू ख्रीष्टसे हमारम बहुत कैक  
 खन्ह्यादेल। ७ असिक उहाँक अनुग्रहले  
 हम्र धर्मी ठह्लाजाइसेकी ओ हमार आशा  
 करल अनन्त जीवनक हकदार हुइसेकी।  
 ८ यी जाट्टीक बात हो। परमेश्वरकम  
 विश्वास करुइयन ध्यान देक असल  
 कामम लगलरहहीं कैक टुँ यिह शिक्षम  
 जोड देओ कना म्वार इच्छा बा।  
 यी शिक्षा सबजन्हक लाग असल ओ  
 फाइदाजनक बा।

९ तर ठरनाठेगानक बातम,  
 अघट्टे-अघट्टेक पूर्वन्हक बातम,  
 ओ यहूदी व्यवस्थक बारेम नैहुइल्  
 वादविवाद कैक झगरा परैना बातसे  
 दूर रहो। ओसिन कामनाकाजक बेकार  
 बात बट्वाक १० मण्डली फुटाइ  
 खोज्ना मनैन एक दुइचो चेतावनी  
 देओ। यदि नैमनहीं कलसे, हुँकन्हक  
 कुछु मतलब जिन करहो। ११ ओसिन  
 मनैन्हक आचरण भ्रष्ट रठन कना बात

टुँ जन्लबाटो। हुँकन्हक आप्पन पाप  
 हुँकन दोषी ठहैठन।

### आखिरी सल्लाह ओ नमस्कार

१२ मै अर्तिमासह या तुखिकसह  
 टुहँरठे पठैना विचार कर्तिबाटु।  
 हुँकमध्ये एक जन टुहँरठे पुगहीं त, टुँ  
 स्याकलसम झट्ट निकोपोलिस शहरम  
 म्वारठे अइहो, काकरकि मै यी साल  
 जार दिन उहँ रना विचार कैरख्नु।  
 १३ जेनास नाउँक वकील ओ अपोल्लोस  
 यात्रम जाइ लगहीं त स्याकलसम  
 हुँकन सहयोग करहो। हुँकन आवश्यक  
 पर्ना सबचिज जुटादेहो। १४ हमार मनै  
 कुछु चिजिक धेर आवश्यक परल  
 समयम सहायता देह सेकहीं कैक असल  
 कामम लगलरहपठा। हुँक विन कामक  
 जीवन जिए नैपरट।

१५ यिहाँ म्वारसँग रहुइयन सब जन  
 टुहिन नमस्कार पठारख्ल। हमन प्रेम  
 कर्ना उहाँ रहल विश्वासीन हमार  
 नमस्कार कैदेहो।

परमेश्वर टुह सबजहन अनुग्रह देहीं  
 कना म्वार प्रार्थना बा।

+३.५ लौव जरम: लौव जरम कलक एक फ्यारा जर्मल मनैया फेदोस आपन डाईक प्याटिम जाक द्वासर फ्यारा जर्मना कहल  
 नैहो, तर पवित्र आत्मासे जर्मना कर्लक हो (यूहन्ना ३:६)।

# फिलेमोनह

## पावलक लिखल चिठी

### चिठीक परिचय

फिलेमोनह चिठी लिखबेर पावल जेलम परल रलह (फिलेमोन ९-१० पद)।

फिलेमोन नोकरचाकर रहल एकठो धनी मनैया रलह, ओ ऊ सम्भवतः कलस्से कना शहरक बासिन्दा रलह। उ पावलक प्रचार करल खुशिक खबर सुन्क ख्रीष्टीयन होरलह (फिलेमोन १९ पद), ओ हुँकाहार घरम ख्रीष्टीयनहुँक संगती करूँट (फिलेमोन २ पद)। हुँकाहार ओनेसिमस नाउँक एकठो नोकर आपन मालिकक् घरमसे भागक रोमम गैरलहा। उहाँ पावलसे वाकर भ्याँट हुइलस्। फलस्वरुप ओनेसिमस येशू ख्रीष्टकम विश्वास करल।

पावलक ब्यालम दास प्रथा धेर चलल् रह। उ ब्यालम रोमी कानून अनुसार दासहुँक आपन मालिकक् सम्पत्तिअस मानजाइँट। यदि हुँक मालिकक् कुछु बिगार कर्ल ओ भागक गैल कलसे, ओसिन अवस्थम त इन हुँकन भँटैलसे कर्ल दण्ड देना कानून रह। कुई कुई त मुवावा फे पाइँट। अस्तै डरलग्टिक अवस्थम रहल ओनेसिमसक लाग फिलेमोनसे बिन्ती कैदेना उद्देश्यले पावल यी चिठी लिखलह। पावल चिठीम फिलेमोन ओनेसिमसह दण्ड देहपर्ना बात नाहीं, तर क्षमा देहपर्ना बात लिखल। आब हुँक दुनु जन येशू ख्रीष्टकम विश्वास कैसेकलक कारण, हुँकन्हक बीचम मालिक ओ दासक सम्बन्धसे फे, विश्वासी डाडु-भाइक सम्बन्ध इन बलगर हुइलक बात पावल स्पष्ट पाररखल।

### विषयसूचि

अभिवादन (१-३ पद)

पावल फिलेमोनक प्रेम ओ विश्वास समझक परमेश्वरह धन्यवाद चहैठ (४-७ पद)

पावल ओनेसिमसक लाग फिलेमोनसे बिन्ती कैदेठ (८-२२ पद)

चिठीक अन्तिम भाग (२३-२५ पद)



### अभिवादन

१ येशू ख्रीष्टक बारेम खुशिक खबर प्रचार कर्लक कारण कैदम परल मै पावल ओ हमार विश्वासी भैया तिमोथी यी चिठी लिखटी। यी चिठी हमारअस काम करइया प्रिय फिलेमोनक लाग, २ हमार विश्वासी बहिन्या अप्फिया, ओ हमारअस परमेश्वरक सेवा करइया अखिप्पस ओ दुहार घरम भेला हुइना मण्डलीक लाग फे हो। ३ हमार परमेश्वर बाबा ओ प्रभु येशू ख्रीष्ट दुहन अनुग्रह ओ शान्ति देहीं।

### पावल फिलेमोनक प्रेम ओ विश्वास समझक परमेश्वरह धन्यवाद चहैठ

४ मै प्रार्थना करबेर दुहिन समझक आपन परमेश्वरह सड्ड धन्यवाद चहैठुँ, ५ काकरकि टुँ प्रभु येशूकम विश्वास कर्लबाटो ओ परमेश्वरक मनैन प्रेम फे कर्लबाटो कना बात मै सुनुँ। ६ हमन देगैल् सब असल चिजिक बुझाइसे ख्रीष्टम विश्वासीहुँकनसे रहल दुहार संगति बलगर हुइटीजाए कना म्वार प्रार्थना बा। ७ हेरो भाइ, टुँ औरजहन प्रेम कर्लक बात सुन्क मै धेर आनन्द ओ उत्साह पारख्नु, काकरकि टुँ परमेश्वरक मनैन्हक मन ताजा बनादेरख्लो।

### पावल ओनेसिमसक लाग फिलेमोनसे बिन्ती कैदेठ

८ टुँ का करपर्ठा कैक मै ख्रीष्टक प्रेरितक रुपम दुहिन आज्ञा देना साहस रलसे फे, ९ हमार प्रेमक कारणले मै दुहिन अनुरोध करटुँ -मै उमेर ढल्कल् पावल ओ आब ख्रीष्ट येशूक एकठो कैदी- १० म्वार छावा ओनेसिमसक लाग मै दुहिनसे अनुरोध करटुँ। मै कैदम रहल समयम जो हुँकाहार विश्वासी बाबाअस होरनु। ११ हुइना त उ टुँहार लाग बिनकामक होरलह, तर आब टुँहार लाग ओ म्वार लाग फे काम लगना होरल।

१२ मै हुँकहिन फेदोस्र टुँहारठे पठाइटुँ। ऊ म्वार मुटुक टुक्राअसक हुइटा। १३ खुशिक खबर प्रचार कर्लक कारण मै कैदी रहल समयम ऊ टुँहार सटाहा म्वार हेरविचार कर सेक्नेरलह कैक मै हुँकहीन आपनसँग ढर चाहलरनहुँ १४ तर टुँहार मञ्जुरी बिना ओसिक कैडर्ना महीह ठीक नैलागल, काकरकि टुँ करकापले नाहीं तर स्वइच्छाले सहायता करल मै चहटुँ।

१५ ऊ सड्डभर टुँहारसँग पलरहीं कैक सायद ऊ डान्चे समयक लाग दुहिनसे अलग होरलह। १६ आब ऊ टुँहार कमारा केल नैहुइट, तर कमारासे

धेर मूल्यवान हुइट, काकरकि ऊ प्रिय भैया हुइटा। हुँकहीन मै धेर प्रेम करटुँ, तर आब टुँ हुँकहीन मनैयक रुपम ओ एकठो विश्वासी भैयक रुपम इन प्रेम कर्वो। १७ उहओसे, यदि टुँ महीह आपनसँग-सँग काम करुइया मन्ठो कलसे, महीह स्वीकार करअस हुँकहीन फेदोस्र स्वीकार करो। १८ यदि उ टुँहार कुछु बिगारऽ कैरखल या टुहिन कुछु तिरहीपर्ना बाटन कलसे फे, उ तिर्ना म्वार जिम्मा होगैल्। १९ मै तिरदेहम कैक मै पावल आप्पन हाँठले लिखटुँ। टुँ म्वार कारणले आत्मिक जीवन पाक टुँ म्वार ऋणी होरलो कना बात मै टुहिन कटीरह नैपरी। २० उहओसे, हेरो भाइ, हम्र प्रभुक मनै हुइलकओसे महीह यी दया देखाओ, ओ ख्रीष्टीयन भैयक नाताले म्वार मनह ताजा बनादेओ।

२१ टुँहार आज्ञापालनम महीह पूरा विश्वास बा, कि टुँ म्वार कहलसे धेर करुइयाबाटो कना बात जान्क मै टुहिन यी चिठी लिखटुँ।

२२ एकठो और बात - म्वार लाग एकठो बैठना क्वाठा ठीकठाक पारदेओ, काकरकि टुन्हक प्रार्थनक कारण मै टुन्हकठे फेदोस्र जाइपैम कना आशा कर्लबाटुँ।

### चिठीक अन्तिम भाग

२३ ख्रीष्ट येशूक सेवा कर्लक कारण म्वारसँग कैदी हुइलक इपाफ्रास टुँहन नमस्कार पठारखल। २४ म्वार सँगसँग काम करुइयन मर्कूस, अरिस्तार्खस, डेमास ओ लूका फे नमस्कार पठारखल।

२५ प्रभु येशू ख्रीष्टक अनुग्रह टुन्हकसँग पलरह।



## शब्दक अर्थ

(नोट: ठूल अक्षरम लिखगैल् थारु शब्दक पाछ कोष्ठम नेपाली शब्द फे देगैल् बा।)

### अगमवक्ता /अगमवाणी

अगमवक्ता कलक परमेश्वरक बलाइल व्यक्ति अर्थात् परमेश्वरक तर्फसे बोल्ना व्यक्ति या परमेश्वरक प्रवक्ता हुइटा। अगमवक्ता कबुकाल “परमेश्वरक जन” (व्यवस्था ३३:१; १ शमूएल ९:६), ओ कबुकाल “परमेश्वरक दास” (२ राजा १०:१०; १७:१३) कैगिल् बा। हुँकन्हक ब्वालल् वचनह अगमवाणी कैजाए।

अगमवक्ताहुँक परमेश्वरक स्वभाव, इच्छा, योजना, अर्ती, चेतावनी, ओ न्याय सम्बन्धी वचन मनैन देहँट। हुँक परमेश्वरसे पाइल वचन मनैन देना क्रमम कबुकाल भविष्यम हुइना घटनक बारेम फे कहँट। उदाहरणक रुपम एलीशा (२ राजा ६:१२) ओ आमोस (आमोस १ ओ २ अध्याय)। कुछ अगमवक्ताहुँक परमेश्वरक वचन लिखल। पुरान नियमम हुँकन्हक लिखल किताब धेर बा।

उ समयम झुटा अगमवक्ताहुँक फे रलह। हुँक आपन मनक बात बट्वाइँट,

तर परमेश्वरसे पाइल वचन कैक दाबी करँट। परमेश्वर हुँकन नैबलैललन तर हुँक अपन्हे अगमवक्ता बन्लह। हुँक मनैन परमेश्वरक आज्ञापालन कर लगाइक लाग नाहीं तर आपन स्वार्थी इच्छा पूरा करक लाग वचन ब्वालँट।

जे होस्, परमेश्वरक अगमवक्ताहुँक राजदरवारम सल्लाह देना काम करँट। हुँक देशम न्याय, नैतिकता ओ पवित्रता कायम हुइपर्ना बातम जोड्देहँट। हुँक देशम आत्मिक अगुवक रुपम धेर महत्वपूर्ण देन देरखल।

लौव नियमम फे अगमवक्ताहुँक सेवा उल्लेख कैगिल् बा। पवित्र आत्मा विश्वासीहुँकन मण्डलीक हितक लाग अगमवाणी बोल्ना वरदान देठ (१ कोरिन्थी १२:१०)। पैल्ह शताब्दीम मण्डली स्थापना कर्ना कामम प्रेरितन्हक सँगसँग अगमवक्ताहुँक फे धेर देन देल।

### अनन्त जीवन

अनन्त जीवन कलक यी जीवनम येशू ख्रीष्टक सम्बन्धम रहक जीना ओ मुलसे स्वर्गम जैना जीवन हो (यूहन्ना १७:३-२६; १ यूहन्ना २:२४-२५)। मनै येशूकम विश्वास कर्ल कलसे, हुँकन्हकम अनन्त जीवन शुरु हुइठन (यूहन्ना ३:१६), तर यी जीवनक पूर्णता भर हुँक मुलसे केल पैठ (१ कोरिन्थी १५:५२-५४)। हुँक पापक क्षमा पैठ ओ परमेश्वरक सन्तान हुइठ (यूहन्ना १:१२; १ यूहन्ना ३:१)।

### अनुग्रह

बाइबलम अनुग्रह कलसे क्षमादान, मुक्तिदान, अचूक प्रेम, अपार कृपा आदि विषयह समेट्ठा। निगाहा, दया आदि शब्द फे अनुग्रहक अर्थ देठा। परमेश्वरक अनुग्रह कारणले हम्र मुक्ति पैठी (एफिसी २:८; तीतस २:११)। हम्र पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)। येशूक मृत्युद्वारा परमेश्वर आपन पाप स्वीकार कर्ना ओ उहाँकम विश्वास कर्ना मनैन क्षमा देठ। मुक्ति कुई फे कमाइ नैस्याकट्, यी त परमेश्वरक अनुग्रहस्वरुप मनैन देगैल वरदान हो।

परमेश्वर आपन अनुग्रहद्वारा इस्राएलीहुँकन आपन मनै हुइक लाग

रोज्लह (व्यवस्था ७:७-८)। मनै लौव हृदय पैना बात फे परमेश्वरक देहल अनुग्रहक वरदान हो कैक अगमवक्ताहुँक बुझल (इजकिएल १८:३१)। परमेश्वरक अपार कृपक कारणले केल मनै उहाँक पवित्र मन्दिरम जाइसेक्ना बात भजनसंग्रहम लिखौल बा (भजनसंग्रह ५:७)।

येशूक सिखाइल वचनम फे धेरजसिन अनुग्रहक सिद्धान्त पाजैठा। जस्तै – काम करुइयन्हक आहानम, डान्चे समय केल काम करुइयन फे पूरा ज्याला पैठ (मत्ती २०:१-१६), बराभ्वाजक आहानम, निउँता पैना असम्भव मनै फे भ्वाजम सहभागी हुइ पैठ (लूका १४:१६-२४), हेराइल छावक आहानम, छोट्की छावा दण्ड पैना योग्यक रलसे फे घरमा स्वागत कैजिठा (लूका १५:११-२४)।

पावल धेरजसिन चिठीक शुरुम अभिवादन करबेर ओ अन्त्यम आशिषक कामना करबेर “अनुग्रह” शब्द प्रयोग कैरखल। पावल, रोमी १:१६-४:२५ म, मनै पापी बाट ओ परमेश्वरसे दूर होरल, तर परमेश्वर आपन अनुग्रहद्वारा हुँक कबु फे पाप नैकरलअस हुँकनसे व्यवहार कठ। हम्र पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)। परमेश्वरक अनुग्रहक कारणले

हम्र मुक्ति पैठी (एफिसी २:८; तीतस २:११)।

### एल्डर

अघट्टे जमानम धेरजसिन समाजम अनुभवी, परिपक्व, गन्नेमान्ने ओ प्रभावशाली मनै सामाजिक छलफल ओ क्रियाकलापम महत्वपूर्ण देन देना योग्य व्यक्ति मानजाइँट। हुँक एल्डर कैजाइँट। इस्राएल देशम फे समाजम सरसल्लाह देहक लाग, न्यायनिसाफ ओ शासन करक लाग एल्डरहुँक रलह। पुरान नियमम इस्राएलीन्हक बीचम हुँकन अगुवाइ करक लाग परमेश्वर एल्डर नियुक्त करँट (प्रस्थान २४:१)। लौव नियमम मण्डलीम प्रचार कर्ना, सिखैना, सञ्चालन कर्ना, रेखदेख कर्ना मनै एल्डरहुँक रलह (प्रेरित ११:३०; १५:६; २०:१७)। जस्तै यूहन्ना एकठो एल्डर रलह (२ यूहन्ना १), पत्रुस एकठो एल्डर रलह (१ पत्रुस ५:१)। पावल तीतसह मण्डलीम एल्डरहुँकन नियुक्त कर्ना आदेश देरखल (तीतस १:५)। मण्डली इतिहासम एल्डरहुँक मण्डलीक प्रशासनिक कामकाज करक लाग ओ विश्वासीहुँकन वचन प्रचार करक लाग, सिखाइक लाग, ओ हुँकन्हक आत्मिक जीवनक रेखदेख करक लाग अधिकार पाइल् अगुवन रलह।

एल्डरहुँकन्हक नियुक्ति, आवश्यक चारित्रिक गुण ओ व्यवहार सम्बन्धम थप जानकारीक लाग १ तिमोथी ३:१-१७; ४:१४; ५:१७-२२; तीतस १:५-९; याकूब ५:१४; १ पत्रुस ५:१-४ हेरी।

### खुशिक खबर (सुसमाचार)

साधारण हिसाबले खुशिक खबर कलक मजा खबर हो। तर बाइबलम, खुशिक खबर कलसे एकठो विशेष अर्थ लग्ठा। धेर वर्ष आघ, परमेश्वर इस्राएलीन मुक्ति देना बाचा कैरखलह (यशैया ९:१-७)। परमेश्वर उ बाचा येशू ख्रीष्टकम पूरा कर्ल ओ सक्कुजन्हक लाग मुक्तिक इवार खोलदेल (कलस्सी १:१३)।

खुशिक खबर कलक यहि हो कि येशू ख्रीष्ट सारा संसारह मुक्ति देना परमेश्वर हुइट, ओ उहाँ मनैन पापमसे मुक्ति दिहक लाग यी संसारम अइल (१ पत्रुस २:२४; रोमी ६:२३)। पापमसे मुक्ति पाइक लाग, मनै येशू ख्रीष्टकम विश्वास कर्ना बाहेक और कुछ कर नैपरट (यूहन्ना १:१२; ३:१६)। मनैन्हक लाग सबसे खुशिक खबर यहि हो।

### दया

दया कलक औरजन्हकम दुख, अभाव, आपतविपत परल समयम, हुँकन सहायता करक लाग मनम

## शब्दक अर्थ

५०

अइना एकठो भावना हो। यहीह कबुकाल कृपा या निगाहा फे कैजिठा। परमेश्वर गरीब मनैन, टुवर लर्कन, विधवन ओ अरदेशीपरदेशीन दया करपठा कैक आपन वचनम कैरखल (भजनसंग्रह १४६:९; हितोपदेश १९:१७; जकरिया ७:९-१०; मीका ६:८)। परमेश्वर आपन करल सारा सृष्टिम दया कर्लबाट (भजनसंग्रह १४५:९), ओ उहाँ हमन दया कर्लक कारण हम्र मुक्ति पारखली (एफिसी २:४; तीतस ३:५)। येशू आपन चलन कल, “टुन्हक स्वर्गक परमेश्वर बाबा दयालु रहलअस, टुह फे दयालु होओ” (लूका ६:३६)। एकठो मुवमुव मनैयह देख्क सामरीया क्षेत्रक मनैयह दया लगलन् (लूका १०:३३)। दया एकठो भावना हो, जेहीह कामले ओ व्यवहारले व्यक्त कैजिठा।

## परमेश्वर

परमेश्वर आत्मा हुइलकओसे, उहाँह द्याख नैसेक्जाइट् (रोमी १:२०; कलस्सी १:१५; १ तिमोथी १:१७; ६:१५-१६)। तर फे बाइबलम का लिखल बा कलसे उहाँ बोल्ल (उत्पत्ती ३:८-१९; ९:१६; मर्कूस १:११), सुन्ठ (अय्यूब ३४:२८; भजनसंग्रह ११६:१), देख्ठ (भजनसंग्रह ३३:१३-१४; हितोपदेश ५:२१), रिसैठ (प्रस्थान २२:२४; रोमी १:१८,

प्रेम कठ (यूहन्ना ३:१६), ओ सोगैठ (हिब्रू ४:१५-१६)। परमेश्वर एक्क समयम सब ठाउँम बाट (भजनसंग्रह १३९:७-१०; यर्मिया २३:२३-२४), उहाँ सब चिज जन्ठ (भजनसंग्रह १३९:१-४; दानियल २:२०-२२), उहाँ सककुनसे शक्तिशाली बाट (अय्यूब ४२:२; लूका १:३७), उहाँ सड्डभर पलबाट ओ पलरहुइयाबाट (१ तिमोथी १:१७; प्रकाश ११:१७; १५:७), ओ उहाँ कबु फे पाप नैकर्ल ओ कबु फे पाप करुइया नैहुइट (याकूब १:१३ १; पत्रुस १:१:१५)।

उहाँ स्वर्ग, पृथ्वी ओ उहिम रहल सबचिज सृष्टि कर्ल (यर्मिया ५१:१५; हिब्रू २:१०)। उहाँ मनैन्हक भलो चहठ (यर्मिया २९:११)। उहओसे परमेश्वर मनैन पापमसे मुक्ति देना योजना बनाक उह अनुसार काम कर्ली। येशू ख्रीष्टकम विश्वास कर्लसे मुक्ति पैना बात बाइबलम लिखल बा (रोमी ५:१०; हिब्रू २:१४-१५)।

परमेश्वर तीनठो व्यक्तित्वम बाट: बाबा परमेश्वर, छावा परमेश्वर, ओ पवित्र आत्मा परमेश्वर (मर्कूस १:१०-११)। ख्रीष्टीयन इतिहासम यहीह त्रिएक परमेश्वर कैगिल् बा। हम्र बाइबलम का देख्ठी कलसे, हुइना त परमेश्वर तीनठो व्यक्तित्वम बाट, तर उहाँ एक्कठो परमेश्वर हुइट, तीनठो परमेश्वर नैहुइट (व्यवस्था ६:४)।

**परमेश्वरक छावा (परमेश्वरको पुत्र)**

परमेश्वर तीनठो व्यक्तित्वम बाटः परमेश्वर बाबा, परमेश्वर छावा, ओ परमेश्वर पवित्र आत्मा। येशू ख्रीष्ट परमेश्वरक छावा हुइटा। परमेश्वरक छावा रलसे फे, उहाँ परमेश्वर बाबक सृजाइल नैहुइटा। कन्या मरियमक कोखिमसे जरमक उहाँ परमेश्वरक छावा हुइलक नैहुइटा। उहाँ सड्डभर परमेश्वरक छावा पलबाट ओ पलरहुइयाबाटा। उहाँ अधिकार, शक्ति, आदर, ओ अस्तित्वम परमेश्वर बाबसे कम नैहुइटा। उहाँकम परमेश्वरकम रहपर्ना गुण रलकओसे, उहाँ परमेश्वरऽ हुइटा (यूहन्ना १:१-२; कलस्सी १:१५-२०; हिब्रू १)।

येशू ख्रीष्ट मनैया होक यी संसारम जरम लेल त, उहाँकम मनैन्हक गुण फे थपगैलन। उहाँ परमेश्वर बाबक आज्ञाकारी होक जील ओ कूसम मुल। मनैया हुइलकओसे, उहाँ कूसम मुवबेर सारा मनैन्हक प्रतिनिधित्व कर्ल ओ सबजन्हक पाप बोक्ल (हिब्रू २:५-१८)।

**परमेश्वरक राज्य (परमेश्वरको राज्य)**

परमेश्वरक राज्य संसारक राज्यअस नैहो। उहाँक राज्यम भौगोलिक सिमा नैरहट, राजनैतिक पार्टी नैरहट, वर्गीय ओ जातिय

भेदभाव नैरहट। परमेश्वरक राज्य कलक परमेश्वरक शासन हो। उ शासनम परमेश्वर राजक रुपम शासन कर्ठ, तर परमेश्वर निरङ्कुश शासन नैचलैटा। उ शासनम अन्याय, अत्याचार, शोषण, दमन, या भ्रष्टाचार कुछु नैहो।

उहाँक शासन त धार्मिक, न्यायिक, ओ पवित्र बाटन। उहाँ प्रेमम, शान्तिम, मिलापम, एकताम राज्य कर्ठ (भजनसंग्रह १४५; यशैया ९:१-७)। उ राज्य मनैन्हक मनम स्थापित हुइना राज्य हो। मनम परमेश्वरक राज्य स्थापित हुइल् मनै आपन जीवनम परमेश्वरह शासन कर देठ।

**परमेश्वरक सन्तान**

परमेश्वरक सन्तान हुइना कलक मानवीय डाईबाबक सन्तान हुइनासे धेर फरक बात हो। उहाँक सन्तान हुइना कलक विशेष अनुग्रह, महान आशिष ओ उच्च सम्मान पैना बात हो। येशूह स्वीकर कर्ना ओ उहाँकम विश्वास कर्ना मनै परमेश्वरक सन्तान हुइना अधिकार पैठ (यूहन्ना १:१२)। परमेश्वरक सन्तान कलक उहाँक गुण या स्वभाव रहल मनै अर्थात् पवित्र आत्मासे जन्मल मनै हुइटा (यूहन्ना ३:६)। उहाँक सन्तान हुइल् मनै ठीक काम कर्ठ (१ यूहन्ना २:२९), पाप कर्टी नैरट (१ यूहन्ना ५:१८), पाप कर

## शब्दक अर्थ

५२

नैसेक्ट (१ यूहन्ना ३:९), प्रेम कर्ठ (१ यूहन्ना ४:७), येशू जो ख्रीष्ट हुइत कैक विश्वास कर्ठ (१ यूहन्ना ५:१)।

## पवित्र आत्मा

पवित्र आत्मा कलक परमेश्वरऽ हुइत (प्रेरित ५:३-४; २ कोरिन्थी ३:१७-१८)। येशू ख्रीष्टकम विश्वास कर्ना मनैन्हकम पवित्र आत्मा बास कर्ठ (रोमी ५:५; ८:९)। पवित्र आत्मक सहायताले, ख्रीष्टीयनहुँकन येशूह परमेश्वरक छावा कैक प्रचार कर्ठ (प्रेरित १:८), बाइबलक वचन बुइना शक्ति पैठ (यूहन्ना १६:१३), सेवा कर्ना अगुवाइ पैठ, आत्मक फारा फराइ सेकठ, पापम नैफँस्ट, ओ लौव जीवन जीना स्वतन्त्रता पैठ (रोमी ८; गलाती ५:२२-२३)। परमेश्वरक योजना संसारम ओ मण्डलीम लागू कर्ना कामम सहायता पुगाइक लाग, पवित्र आत्मा ख्रीष्टीयनहुँकन धेर किसिमक वरदान देठ (रोमी १२:३-८; १ कोरिन्थी १२; एफिसी ४:७-१६; १ पत्रुस ४:१०-११)।

## पाप

औरजन्हक हत्या कर्ना, या औरजहन सँटैना, या दुष्ट काम कर्ना केल परमेश्वरक नजरम पाप नैहो। तर बाइबलम पाप कलक सक्कु खराब विचार (जस्त: ल्वाभ कर्ना, हेल्हा

कर्ना, बिह्ल मुना, घमण्डी हुइना, ओ मूर्ख हुइना) ओ सक्कु खराब काम (जस्त: बेश्या काम कर्ना, चोर्ना, हत्या कर्ना, झग्रा कर्ना, लभर्ना, ठग्ना, बदला लेना) हो (मर्कूस ७:२१-२२; गलाती ५:१९-२१)।

पाप परमेश्वरक विरोधम हुइना काम हो, ओ सबसे छिटिमिटि पाप काम फे परमेश्वरक नजरम नैमजा काम हो। पाप मनैन परमेश्वरसे अल्लैलरठा (रोमी ६:२३)। पाप कर्लक कारण मनैन्हक जीवनम डर, शरम, ओ दुःख आइल (उत्पत्ती ३)। अत्र केल नैहोक, मनै मुव पर्ना फे हुइल (रोमी ६:२३)।

पाप साधारण बात नै हो। बास्तवम मनै पापक बन्धनम परल बाटा। पापक यी बन्धनमसे मनै अपन्हे मुक्ति पाइ नैसेकट। यी बन्धनमसे मुक्ति पाइक लाग, मनै आपन-आपन पापी मन घुमाइपर्ठा ओ येशूकम विश्वास कैक परमेश्वरकठे आइपर्ठा (मर्कूस १:४; यूहन्ना ३:१६)।

पापमसे मुक्ति पैना कलक पापक दण्डसे बच्ना हो। हुइना त, येशूकम विश्वास करुइयन पूरा रुपम पापमसे अल्लौना सम्भव नैहो, तर, परमेश्वरक आत्मक सहायताले, हुँकन आपन मनह पापओर जाइ नैदेना सम्भावना भर बा। असिक, हुँकन परमेश्वरक उपस्थितिम आनन्दित ओ स्वतन्त्र जीवन जीठ (रोमी ६-८)।

### पापी मन घुमाक परमेश्वरकठे अइना (पश्चात्ताप)

“मै पापी हुइहुँ, परमेश्वरसे म्वार विग्रलसम्बन्ध ठीक बनाइपर्ना बा” कैक सौँच्ना, ओ “पाप घिनलगिटिक गलती बात हो ओ मै आपन जीवनम पाप नैचहुँ” कैक निर्णय कर्ना काम पापी मन घुमाक परमेश्वरकठे अइना हो (मर्कूस १:४-५)। पापी मन घुमाक परमेश्वरकठे आइल मनैन्हक सौँचविचार, कामकाज, रहनसहन, सक्कु क्षेत्रम, परिवर्तन हुइलरठन (प्रेरित २६:१९-२०)।

ख्रीष्टीयन जीवनम आपन पापी मन घुमाक परमेश्वरकठे अइना सबसे पैल्हक कदम हो। पापी मन घुमाक परमेश्वरकठे अइना शक्ति परमेश्वर देठ। पापी मन घुमाक परमेश्वरकठे नैआइत्सम, पापमसे छुट्कारा पैना सम्भव नैहो (हितोपदेश २८:१३; मत्ती ५:३-४; मर्कूस १:४, १५; प्रेरित २:३७-३८; २०:२१; २ कोरन्थी ७:१०; २ पत्रुस ३:९)।

### प्रार्थना कर्ना

परमेश्वरसे प्रार्थना कर्ना कलक साधारण अर्थम ख्रीष्टीयनहुँक परमेश्वरसे बातचित कर्ना हो। अत्र केल नैहोक, परमेश्वरसे प्रार्थना कर्ना कलक उहाँक आराधना ओ प्रशंसा कर्ना (भजनसंग्रह १४४-१५०), उहाँह

धन्यवाद चहैना (भजनसंग्रह १३६; १ थिस्सलोनिकी ५:१६-१८), उहाँसेकि उहाँक आघ आपन पाप स्वीकार कर्ना, ओ आपन पाप क्षमक लाग उहाँसे पुकारा कर्ना फे हो (दानियल ९:३-२३; १ यूहन्ना १:९)। परमेश्वरसे आपन घटकमीक माग कर्ना फे हो (याकूब १:५; फिलिप्पी ४:६-८)।

यदि हम्र परमेश्वरक आज्ञाकारी जीवन जीलबाटी कलसे, परमेश्वर हमार करल प्रार्थना सुन्ठ ओ वाकर उत्तर देठ (भजनसंग्रह ६६:१६-२०; हितोपदेश १५:२९)। परमेश्वरसे प्रार्थना कर्ना काम उहाँसे सम्बन्ध बहैना एकठो मजा तरिका फे हो। परमेश्वरसे प्रार्थना कर्ना काम उहाँसे, उहाँकम विश्वास करल मनैन्हक जीवनम भारी-भारी शक्तिक काम हुइल बाटन (याकूब ५:१३-१८)। उहमार परमेश्वरसे प्रार्थना कर्ना ख्रीष्टीयन जीवनक एकठो मुख्य भाग हो।

### प्रेरित

बाइबलम प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक च्वाजल बाह्र जन चेलावँ हुँइट (मर्कूस ३:१४; ६:३०)। येशू ख्रीष्ट स्वर्गम उठागैल त, उहाँक कामह उह प्रेरितहुँक निरन्तरता देल। हुँक मुवलमसे फेदोस्र जीलक येशू ख्रीष्टह

आपन आँखिले देखलह ओ परमेश्वरक आत्मले भरलरलह। हुँक ठाउँ-ठाउँम मण्डली स्थापना कर्ल, ओ मनैन परमेश्वरक वचन सिखैल। पाछ जाक यी बाहू जन बाहेक पावल लगायत और मनै फे प्रेरितम गनगैल (प्रेरित १४:१४; १ कोरिन्थी ९:१-२)। येशूक चाजल, ओ पाछ थपगैल, उह प्रेरितहुँक मण्डलीक जग हुइल।

### बप्तिस्मा

बप्तिस्मा एकठो यहूदी संस्कार रह। जब यहूदी जात नैरहल मनै परमेश्वरकम विश्वास कर्ना ओ यहूदी धर्मक हिसाबले चलना निर्णय करैट, तब बप्तिस्मा लिहँट। येशूक समयम बप्तिस्मा देहुइया यूहन्ना येशूक लाग मनैन तयार पर्ना कामम, उह बप्तिस्मा संस्कार प्रयोग कर्ल। मनै आपन-आपन पाप स्वीकार कर्ती, पापी मन घुमाक परमेश्वरकठे आइपर्ना ओ परमेश्वरक कहल अनुसार चलना चाहना कर्लक प्रमाणक रुपम बप्तिस्मा लिह पर्ना बात यूहन्ना बटवैल (मर्कूस १:४)।

येशू आपन चलन उहाँकम विश्वास कर्ना मनैन बप्तिस्मा दिह पर्ना आज्ञा देल (मत्ती २८:१८-२०)। शुरुक मण्डलीम येशूक चेलावँ येशू ख्रीष्टकम विश्वास करल मनैन बप्तिस्मा देलक बात इतिहासम बा (प्रेरित २:३८, ४१; ८:१२-१३, ३६-३८; १०:४६-४८)।

येशूक समयठेसे चलल ख्रीष्टीयन बप्तिस्मा संस्कार मण्डलीम आम्हीसम चल्ती बा। येशूह मुक्ति देहुइया व्यक्ति कैक करल विश्वासह सार्वजनिक रुपले घोषणा करक लाग, ख्रीष्टीयनहुँक बप्तिस्मा लेठ।

धेर जसिन, बप्तिस्मा लिहबेर ख्रीष्टीयनहुँक पानीम बुठ। पानीम बुर्ना कलक आपन पापी स्वभावक लेखि मुना संकेत हो, ओ पानीमसे उठना कलक लौव आत्मिक जीवन पैना संकेत हो (रोमी ६:३-४)। पापी स्वभावक लेखि मुना कलक आब पाप हमार मलिक्वा निहो कहल हो, याकर मतलब हम्र कबु फे पाप निकर्ती कहल निहो। याकर मतलब त हम्र पाप कर लगैना हमार पापी स्वभावक कब्जम निहुइटी कहल हो। आब हम्र परमेश्वरक इच्छा अनुसारक जीवन जीएक लाग स्वतन्त्र बाटी।

### मण्डली

मण्डली कलक ख्रीष्टीयनहुँकन्हक भेला हो। उ भेलम हुँक परमेश्वरक प्रशंसा ओ आराधना कर्ठ, संगती कर्ठ, एक औरजहन उत्साह देठ, ओ परमेश्वरक वचन सुन्ठ आदी (प्रेरित २:४२-४७)। असिक हुँक विश्वासम बलगर ओ परिपक्व हुइटी जैठ। अगुवन धेर जसिन समयम परमेश्वरक वचनमसे सिखैठ। हम्र बुझपर्ना



महत्वपूर्ण बात का हो कलसे, मण्डली कलक मण्डली घर नैहो, तर येशू ख्रीष्टकम विश्वास करल मनैन्हक विशेष भेला हो।

### मुक्ति

मुक्ति कलक खतरामसे बँचाजैना ओ सुरक्षित ठाउँम स्वतन्त्र रूपले जीए पैना हो। बाइबलम मुक्ति कलक पापक बन्धनमसे ओ परमेश्वरक दण्डसे छुटकारा पैना (यूहन्ना ३:१६; रोमी ६:२३), ओ लौव जीवन पैना हो। हम्र पापक बन्धन ओ परमेश्वरक दण्डसे छुटकारा पाइल मनै यी लौव जीवन जीए सेकठी (रोमी ६:१-१३; ८:१, ३२-३४; कलस्सी १:२२), ओ परमेश्वरक चाहल अनुसार यी जीवन जीएक लाग शक्ति पैठी (रोमी ८; एफिसी ५:१८; कलस्सी १:९-१२)। बाइबलक हिसाबले मनैन पापमसे बँचाइ सेकना व्यक्ति येशू ख्रीष्टकम विश्वास कैक केल मुक्ति पाजैठा (प्रेरित ४:१२; १ तिमोथी २:५)।

### मुवलमसे फेदोस्र जीना (पुनरुत्थान)

येशू कूसम मुल त, मनै उहाँक शरीरह एकठो बरानक पत्थ्रा खोल्क बनाइल गन्थम ढर्ल (मर्कूस १५:४३-४६)। पाछ, येशू फेदोस्र जीगैला यी चाहिँ और जुनी लेक अइना काम नैहो (अर्थात् च्वालाला फेर्ना काम फे नैहो), भेष

बदलना काम फे नैहो। तर मुनासे आघ येशूक उमेर, रुप, रङ्ग जसिन रलहन, मुवलमसे फेदोस्र जील त, उह उमेरम, उह रुप, रङ्गम उह येशू जीटी बाट कना बात हो।

संसारक पूरा इतिहासम सबसे महत्वपूर्ण घटना येशू ख्रीष्ट मुवलमसे फेदोस्र जीयल घटना हो (मर्कूस १६:१-८)। इतिहासक अन्त्यम सब मनै मुवलमसे फेदोस्र जीजउइयाबाट - येशूकम विश्वास कर्ना मनै सबजन स्वर्ग जउइयाबाट, विश्वास निकरुइयन भर नरकम जउइयाबाट। स्वर्ग जउइयन्हक शरीरम, भूतपन्थात लाग नैसेकट, च्वागबिन्चाग नैलागट, पाप नैरहट, ओ कुइ फे मुवाइ नैस्याकट (१ कोरिन्थी १५:५१-५७)।

### यहूदी (हिब्रू/इस्राएली)

यहूदी, हिब्रू, या इस्राएली एकक जतिक मनैन जनैना नाउँ हो। पुरान नियमम सबसे पैल्ह हिब्रू अब्राहाम रलह (उत्पत्ती १४:१३), ओ हुँकाहार सन्तान फे हिब्रू हुइल। हुँकन्हक बोल्ना भाषह फे हिब्रू कैजाए ओ येशूक समयम फे हुँक उह भाषा ब्वालँट (यूहन्ना १९:२१; प्रेरित २२:२)। आम्हीसम उ भाषा बोलजैठा।

अब्राहामक नट्या याकूब रलह (उत्पत्ती २५:१९-२४)। याकूबक नाउँ पाछ जाक इस्राएल हुइलन (उत्पत्ती

## शब्दक अर्थ

५६

३२:२९)। इस्राएलक बार भाइ छावन रलहन (उत्पत्ती ३५:२२-२६)। उह बार भाइ छावन्हक सन्तान बार जाति हुइल, ओ हुँक एकमुष्ठ रुपम इस्राएली कैक चिन्हगैल। पाछ जाक हुँक यहूदी कैक फे चिन्हगैल।

वास्तवम “यहूदी” शब्द यहूदामसे आइल हो। याकूबक बार भाइ छावनमध्येम एकठो छावक नाउँ यहूदा रलहन। यहूदक बसोबास करल क्षेत्रक नाउँ फे यहूदा हुइल। तर उ ठाउँ बार कुल रहल देशक एक भाग केल रह। पाछ हुँक उत्तरी राज्य ओ दक्षिणी राज्य कैक दुई भाग हुइल (हेरी १ राजा १२ अध्यायसे पाछओर)। उत्तरी राज्यह इस्राएल कैगिल्, दक्षिणी राज्यह यहूदा कैगिल्।

पाछ जाक अशूर देश उत्तरी राज्यह हमला कैक लैगिलन। तबदोस्र उ उत्तरी राज्यक सब इस्राएलीहुँकन अशूर देशम लैगिल, ओ आपन मनैन उत्तरी राज्यम बसोबास कर लगैल। उ ब्याला दक्षिणी राज्य केल बाँचल, ओ यहूदा देशक मनैन ‘यहूदी’ कहलगलन। यहूदा राज्यह, धेर पाछ, ग्रीकहुँकन्हक ओ रोमीहुँकन्हक समयम, यहूदीया कैगिल्। हुँकन्हक धर्मह यहूदी धर्म कहँट। उ ब्याला “इस्राएलक सन्तानन्” एकमुष्ठ बुझाइक लाग, कबुकाल “इस्राएली” कहँट ओ कबुकाल “यहूदी” कहँट।

आजकाल फे इजराएल देशम ओ संसारक धेर मुलुकम यहूदीहुँक पलबाटा। हुँक आम्हीसम फे पुरान नियमक धेर बात ओ हुँकन्हक आपन परम्परा मन्टीरठा।

## येशू ख्रीष्ट

हुइना त येशूक अस्तित्व सड्डभर पलबाटन, तर फे उहाँ लगभग २००० वर्ष आघ इस्राएल देशम मनैया होक जर्मलह। येशू ख्रीष्ट एकमुष्ठ रुपम बाइबलक ओ ख्रीष्टीय विश्वासक केन्द्रीय पात्र हुइटा। उहाँ एकठो मनैया केल नैरलह, तर परमेश्वर फे रलह। उहओसे उहाँकम परमेश्वरक गुण रलहन। उहाँ मनैया होक जर्मल त, उहाँकम रहल परमेश्वरक गुण नैहेरैलन (यूहन्ना १:१-२; कलस्सी १:१५-२०; हिब्रू १)। असिक उहाँ परमेश्वर त पलरलह ओ उह समयम मनैया फे हुइल (फिलिप्पी २:५-११)। उहाँ मनैया होक जर्मलसे फे, उहाँकम पाप स्वभाव नैरलहन। उहाँ धेर फ्यारा पापम फँस्ता अवस्थम पर्ल, तर पापम कबु फे नैफँस्त (हिब्रू ४:१४-१६)।

परमेश्वरक राज्य आइल देखैटी, येशू खुशिक खबर प्रचार कर्ल ओ उ राज्यम प्रवेश पाइक लाग आपन-आपन पापी मन घुमाक परमेश्वरकठे आइपर्ना बात सिखैल (मर्कूस १:१५)। मनैन पापमसे

मुक्ति दिहक लाग, परमेश्वरक योजना अनुसार उहाँ क्रूसम मुल। उहाँक मुवल शरीरह मनै एकठो गन्यम ढर्ल। वाकर तीसर दिन, उहाँ मुवलमसे फेदोस्र जीगैल (मर्कूस १५-१६)। फेदोस्र जीलक चालीसवाँ दिनम, धेर मनै देख्ती-देख्ती, उहाँ स्वर्गम उठागैल (लूका २४:५०-५२)। आजकाल उहाँ सर्वशक्तिमान परमेश्वरक दाहिन पाञ्जर बैठल बाट (हिब्रू १:३; १०:१२)।

येशू एक दिन आपन राज्य स्थापना कर फेदोस्र अउइयाबाटा। तबदोस्र येशू ख्रीष्टकम विश्वास करल मनै स्वर्गम सङ्गभर परमेश्वरकसँग रहपैहीं, तर उहाँकम विश्वास नैकरल मनै नरकम जैहीं (मत्ती २४-२५)।

## विश्वास

सामान्य रुपम विश्वास कर्ना कलक केकरोम भर पर्ना हो। बाइबलम विश्वास कर्ना कलक खास कैक परमेश्वरकम भर पर्ना हो। परमेश्वरकम भर पर्ना कलक द्याख नैसेकजैना बातम विश्वास कर्ना हो (हिब्रू ११:१)। हम्र परमेश्वरह ओ हमार लाग करल परमेश्वरक प्रतिज्ञा भविष्यम कसिक पूरा हुई कना बात आँखिले द्याख नैसेकटी। तर हम्र बाइबलम परमेश्वरक कहल बात विश्वास कर्नी, जसिन कि, उहाँ हमन प्रेम कर्ठ (१ यूहन्ना ४:८-१०), उहाँ

हमार वास्ता कर्ठ (१ पत्रुस ५:७) ओ आत्मिक जीवन जीएक लाग, आवश्यक पर्ना सब चिज उहाँ हमन देरखल (२ पत्रुस १:३-४)। हुइना त, रुख्वाबरेख्वा या चिरैचुरुङ्गन या हमार आसपासम रहल भौतिक वस्तु द्याखअस असिन बात हम्र आँखिले निदेख्ती, तर फे हम्र असिन बात सत्य हो कैक विश्वास कर्नी ओ उह अनुसार जीठी।

उदाहरणक लाग, मानि ले डगरीम जैटी-जैटी, एकठो सङ्गवा रहल ठाउँम पुगठी। उ सङ्गवा बल्या बा कैक विचार कर्नी, तर उ सङ्गवमसे उपार निजैटी कलसे, उ सङ्गवा जाट्टीसे बल्या बा कैक हम्र विश्वास निकर्नी। तर, यदि उ सङ्गवमसे उपार जैठी कलसे, उ सङ्गवम भर पर्ली कना बात थाहाँ हुइठा। यी बात सङ्गवम विश्वास करल बात हो।

ओसहँक, परमेश्वर परम उपकारी बाट (भजनसंग्रह १४५:८-९; मर्कूस १०:१८), उहाँ हमन मुक्ति देठ (एफिसी २:८-९), ओ उहाँ हर समयम हमार भलो हुइना काम कर्नीबाट कना बात हम्र विश्वास करपर्ठा (रोमी ८:२८)।

## व्यवस्था

साधारण हिसाबले थारु समाजम व्यवस्था कलक राजनैतिक व्यवस्था बुझ्जैठा। तर पुरान नियमम, व्यवस्था

## शब्दक अर्थ

५८

कलक जीवनक सक्कु पक्षह समेट्ठा: मजा ओ नैमजा व्यवहार, धार्मिक क्रियाकलाप, ओ सामाजिक जीवन (राजनीति समेत)। इस्राएलीन्हक शासक परमेश्वर हुइलकओसे, व्यवस्था कलक परमेश्वरक इच्छा, आज्ञा, ओ नियम हो। व्यवस्था भङ्ग कर्ना कलक परमेश्वरक आज्ञा नैमन्ना हो, या नियम उल्लङ्घन कर्ना हो, या पाप कर्ना हो। उहओसे इस्राएलीहुँक सब काम व्यवस्था अनुसार करँट। सब काम कलक पारिवारिक ओ सामाजिक क्रियाकलाप (जस्त: भ्वाजकाज, मर्नीकर्नी, स्वास्थ्य ओ सरसफाइ), धार्मिक क्रियाकलाप (जस्त: परमेश्वरक आराधना, ओ टैटिहार) आदि पर्ठा।

शुरुम, परमेश्वर मोशह दश मुख्य आज्ञा देलह (प्रस्थान २०:१-१७)। पाछ, यी आज्ञह मोशा बिस्तारित रुपम बाइबलक पैल्ह पाँचठो किताबम लिखल (उत्पत्ती, प्रस्थान, लेवी, गन्ती, ओ व्यवस्था)। बाइबल पुरान नियम ओ लौव नियम कैक दुई भागम लिखल बा। पुरान नियमम, यी पाँचठो किताब समेत, जम्माजम्मी उनन्चालीसठो किताब बा। पुरान नियमक और किताब परमेश्वरक वचन बोलुइयन, राजाहुँक, ओ और मनै लिखलह। यी सक्कु मनै यहूदी रलह। कबुकाल पूरा पुरान नियमह व्यवस्था

कैजिठा (यूहन्ना १०:३४; १२:३४; १५:२५)। कबुकाल जुन पुरान नियमक पैल्ह पाँचठो किताबह केल व्यवस्था कैजिठा (लूका २४:४४)।

परमेश्वर "इस्राएलीहुँकन दिहस्" कैक मोशह दश आज्ञा ओ बाइबलक पैल्ह पाँचठो किताबम रहल और व्यवस्था दिहलओसे, मोशक लिखल यी पाँचठो किताबह कबुकाल मोशक व्यवस्था फे कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)।

ख्रीष्टीयनहुँक बुझपर्ना महत्वपूर्ण बात का हो कलसे पुरान नियमक धेर जसिन व्यवस्था, जसिन खाना ओ स्वास्थ्यसे सम्बन्धित व्यवस्था ओ निश्चित धार्मिक व्यवस्था, हमार लाग येशूक आनल मुक्तिक कारणले प्रभावकारी निहो (गलाती ३:२३-२९; हिब्रू ९:१-१०:१८)। तर येशू व्यवस्था भङ्ग कर अइलक निहुइट, उहाँ त व्यवस्था पूरा कर अइलक हुइट (मत्ती ५:१७-२०)।

## शैतान

शैतान भूतन्हक रज्वा हो (मर्कूस ३:१३) ओ परमेश्वरक मुख्य शत्रु हो। उ फे आत्मा रलकओसे, ओही द्याख नैसेकजाइट। वाकर मुख्य काम कलक परमेश्वरक विरोध कर्ना हुइस, तर शैतान मनपर्दी कुछु फे कर

नैपाइट्(अय्यूब १)। शैतान परमेश्वरक विरोध केल नैकरट, तर मनैन दुःख देना काम फे कर्ठा। उ मनैन्हकम पापी मन जगादेठा, उहओसें मनै औरजहन ठग्ना, ढँठना, लुट्ना, ओ मुवैना काम कर्ठा। असिक मनै पापम फँसठ (यूहन्ना ८:४४; १३:२; २ कोरिन्थी २:११; एफिसी ६:११; १ तिमोथी २:२४)। शैतान मनैन परमेश्वरकम विश्वास कर नैदिहट् (२ कोरिन्थी ४:४)। उ परमेश्वरक करल सृष्टि ओ योजना भताभुङ्ग पर्ना काम कर्ठा, तर परमेश्वरसे अनुमति पाइलसम केल बिगार करसेकठा (अय्यूब १:१२; २:६)।

हम्र परमेश्वरक शक्तिले केल शैतानह हराइसेकठी। यदि हम्र शैतानक विरोध कर्बी कलसे, उ हमारठेसे भग्नेबा (याकूब ४:७)। क्रूसम टङ्गागिल येशू शैतानह हारखल (हिब्रू २:१४-१५)। उह फे संसारम वाकर शक्ति आम्हीसम पलबाटस। तर अन्तम, शैतानह सह निसेकजैना दुःख भ्वाग परहिँस, काकरकि उ आगीक भट्ठीम फाँकजैनेबा (प्रकाश २०:७-१०)।

## स्वर्ग

स्वर्ग परमेश्वरक घर हो। स्वर्गक खबर पुगुइयन उहँ परमेश्वरक आराधना कर्टीरठा। येशूकम विश्वास करुइयन मुलसे, स्वर्गम सड्भर परमेश्वरकसँग रहइयाबाट। मुक्ति पैना कलक स्वर्ग जैना हो (२ कोरिन्थी ४:१६-१८; १ पत्रुस १:४)। स्वर्ग कलक दुःखकष्ट, रोगबेरा, झग्राझाँटी, या चिन्ताफिक्री नैहुइना ठाउँ हो, तर खुशी, आनन्द, सुखचैन, रमाहटम रहपैना ठाउँ हो (२ तिमोथी ४:१८; १ पत्रुस ५:१०; प्रकाश २१:१-४)।

## स्वर्गदूत

स्वर्गदूत परमेश्वरक सेवा करुइयन हुइट (हिब्रू १:७)। हुँक मनै नैहुइट, ओ हुँकन्हकम पाप नैरटिन। सामान्य रुपले हुँकन द्याख निसेकजाइट, तर जब परमेश्वर हुँकन मनैन्हकठे खबर पुगाइ पठैठिन, तब हुँक मनैअस देखपठ। कबुकाल मनैन्हकठे देखपरबेर, हुँक चहूकार उज्जर झुल्वा घाललअस देखपठ। हुँकन्हक मुह फे चहूकार उज्जर देखपठिन, ओ हुँकन देखक मनै डरैठ (मत्ती २८:२-३; मर्कूस १६:५-८; लूका १:११-१३; २:९)।

जे होस्, स्वर्गक खबर पुगुइयन मनैअस नैहुइट, काकरकि हुँक

## शब्दक अर्थ

६०

भ्वाजविहा नैकर्ट, ओ लर्कापर्का  
 नैजमैट (मर्कूस १२:२५)। हुँक  
 परमेश्वरक सेवा ओ उहाँक खबर  
 मनैन्हकठे पुगादेना काम केल नैकर्ट,

तर परमेश्वरक आराधना फे कठ  
 (लूका २:१३-१४; हिब्रू १:६; प्रकाश  
 ५:११-१२)।